

Inatsisissatut siunnersuummut oqaaseqaatit

Nalinginnaasumik oqaaseqaatit

1. Aallaqqaasiut

1.1. Inatsisissatut siunnersuutip pingaarnerusutigut tunuliaqutaa

Siunnersuutip pingaarnertut siunertaraa Kalaallit Nunaanni ilinniarfiit inissaasa atorluanaanissap qularnaarnissaat, Kalaallit Nunaanni folkehøjskolit pitsaanerusumik atorneqarnissaasa qularnaarnerisigut.

Ilutigisaanik oqaatigineqassaaq, folkehøjskolit aammattaaq namminneq kissaatiginikuugaat, inuiaqatigiinni piginnaasat qaffassarnerinik suliaqarnermut annertunerusumik peqataatinneqarnissartik.

1.2. Inatsisissap piareersarnerani pingaarnarit

Folkehøjskolit siunissami inissisimanissaat pillugu 19. aamma 20. april 2016

isumasioqatigiittoqarpoq. Isumasioqatigiinnermut peqataapput Knud Rasmussenip Højskolia, Sulisartut Højskoliat, KANUKOKA, taamani Inuussutissarsiornermut,

Suliffissaqartitsineranut Niuernermullu Naalakkersuisoqarfiusoq aamma Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik.

Isumasioqatigiinnermi aammattaaq inatsisinut aningaasaqarnermullu tunngasut aammattaaq oqallisigineqarput. Oqallinnernut ilaavoq Folkehøjskolit pillugit Inatsisartut inatsisaata nr. 24, 18. november 2010-meersup nutarternissaata qanoq siunertamut naapertuutsigineranik naliliineq.

Ilutigisaanik misissorneqarpoq inatsit maanna atuuttoq, folkehøjskolit pingaarnertigut ilinniartitsineranut piginnaanngorsaanermullu atatillugu periusissianut peqataanissaannut eqqortunik sinaakkutissiinersoq. Tamatumani ilanngullugu eqqarsaatigineqarpoq folkehøjskolit suliffeqarfittut imminnut pigisutut tamatumalu kingunerisaanik pisortanit akuliuffigineqartussaannigitsutut inissisimanerat. Tamatumunnga atatillugu aammattaaq misissorneqarpoq, pisortanit tapiisarnikkut aningaasalersuineranut ilusiliussaasoq maanna atuuttoq siunertat pingaarnerusut tapersorsornissaannut naleqqiullugu siunertamut naapertuunnersoq.

Folkehøjskolit aammattaaq tamatumunnga atatillugu oqariartuutigaat, ilinniartitsineranik ingerlatsinerit pisortatigut piumasaqaatit naapertorlugit piginnaaneqalersitsisumik ilinniartitsinerunngitsut salliutinneqarumasut, folkehøjskolit ingerlatsineranik nalinginnaasumik peroriartuutaasumik inuttullu ineriartuusaasumik qitiutitsinerat naapertorlugu. Taamaalilluni højskolit qitiusumik ingerlataat højskolimi ilinniartut ataasiakkaat inuttut ilisimasatigullu ineriartornissaannut attuumassuteqartuupput. Aammattaaq

qitiutinneqarpoq ilinniartut inuunermut, inuutissarsiutitaarnissamut ilinnialernissamullu piareernissaannik pilersitsinissaq. Ullumikkut folkehøjskolimi ataatsimi ukiumut ilinniartut 20-t missaanniittarput, qinnuteqartullu 200-nik amerlanerusarlutik. Tamatumalu kinguneraa illutatigut inissat annertusiniarlugit pilersaaruteqalerneq, nutarterinikkut nutaanilluunniit sanaartornikkut.

Aammattaaq oqallisigineqarpoq, malittarisassat atornerinut atatillugu qanoq iliorluni inatsisiliornikkut ulluinnarnilu sulinermi allaffissorneq annikillisarneqarsinnaanersoq.

Isumasioqatigiinnermi aamma isumaqatigiissutigineqarpoq, siunertamut naapertuuttuussasoq Namminersorlutik Oqartussat akuersinerat nakkutilliinerallu tunuliaqutaralugit, ilinniartut meeqqat atuarfianni inaarutaasumik misilitsinnissaat siunertaralugu folkehøjskolit ilinniartitsisinnaanissaasa akuerinissaat inatsisitigut periarfissinneqassapat.

Aammattaaq inassutigineqarpoq, inissamik atuilluarneq annertunerusoq angujumallugu ilutigisaanillu Namminersorlutik Oqartussat aningaasaliissutaasa ingerlassallu pissusissamisuginnartumik imminnut ataqatigiilluarnissaat qularnaarumallugu, tunngaviumik tapeeriaatsimut aamma sapaatip-akunnerinut ilinniartoqarfiusunut taxameteri malillugu tapeeriaatsimut ilusiliussassamik pilersitsisoqassasoq. Taamaaliorerup – ullumikkut pissutsit akerliannik – nassatarissavaa folkehøjskolit ilinniartunngortitsisarnermik annertusarnissaanut kajuminnerulersinneqarnerat.

Tamakku saniatigut isumaqatigiissutaavoq, taxameteri malillugu tapiisarnermik aaqqissuussinnermut ilaasunut atatillugu, højskolernermut atuisut akiliuteqartarnerisa atorunnaarsinneqarnissaat siunertamut naapertuuttuussasoq, taamatullu kommunit ilinniartut akiliutissaannut ilaatinneqartarnerat atorunnaartariaqartoq. Ilutigisaanik inassutigineqarpoq erseqqissarneqassasoq, ingerlatsisut allat isumaqatigisinnarlugit ilinniartitsinermik ingerlatsinernik højskolernertut ingerlataannngitsunik folkehøjskolit neqeroorsinnaasut. Tassunga ilanngullugu oqaatigineqassaaq siunnersuut folkehøjskolinut tusarniaassutigeqqaarneqarnikummat. Tamatumalu kinguneraa siunnersuummi nr. 1-itut ilusilerlugu erseqqissaateqarneq, tassani periarfissiisoqarmat ilinniartitsissutit assassoriaanerusut ingerlannissaannut, soorlu sullivinni ingerlatsinerit ilinniartitsinermi initunerulersinnaanngorlugit.

2. Inatsisissatut siunnersuummi pingaarnerit

a) Inatsit atuuttoq

Inatsit atuuttoq tassaavoq Folkehøjskolit pillugit Inatsisartut inatsisaat nr. 24, 18. november 2010-meersoq.

Atuartitsissutit ataasiakkaat imaluunniit atuartitsissutit ataatsimoortut sallitinnissaannut periarfissaq:

Inatsisartut inatsisaanni atuuttumi § 1, imm. 1, naggatit aappaanni ersippoq folkehøjskolit nalinginnaasumik peroriartuutaasumik atuartitsinerup iluani atuartitsissutit ataasiakkaat imaluunniit atuartitsissutit ataatsimoortut sallitinnissaagaat.

Meeqqat atuarfianni inaarutaasumik misilitsinnernik ingerlatsisinnaaneq:

Inatsimmi § 1, imm. 3-mi, naggammi siullermi ersippoq, folkehøjskolit ilinniartitsineq misilitsinnissaq siunertaralugu ilinniartitsinerup ilaqartoq neqeroortigisinnaagaat, malittarisassat atuuttut naapertorlugit meeqqat atuarfianni inaarutaasumik naliliinerit ilaannut peqataanissaq, ilinniakkani allani ilinnialissutaasinnaasumik ilinniartinneqarnissaq, inuutissarsiutinik tunngaviusumik ilinniartitsinerup iluani ilinniartinneqarnissaq aamma ilinniarnertuunngorniarfimmi atuartitsissutinik ataasiakkaanik ilinniartinneqarnissaq siunertaralugit.

Aalajangersakkami meeqqat atuarfianni inaarutaasumik misilitsinnissamut ilinniartitsinerup, ilinniakkani allani ilinnialissutaasinnaasumik ilinniartitsinerup kiisalu ilinniarnertuunngorniarfimmi atuartitsissutinik ataasiakkaanik ilinniartitsinerup aamma inuutissarsiutinik tunngaviusumik ilinniartitsinerup neqeroorsinnaanissaq tunngavissinneqarpoq.

Ilinniakkani allani ilinnialissutaasinnaasumik ilinniartitsisinnaanermut tunngasoq ima paasineqassaaq, folkehøjskolit aalajangiussinnaagaat pisortatigoortumik ilinniakkani aalajangersimasuni ilinnialissutaasinnaasumik ilinniartitsiumallutik. Tamatumani assersuutigalugu pineqarsinnaapput perorsaasutut imaluunniit tusagassiortut ilinniakkaniluunniit allani ilinnialernissamut piareersaaneq, aammattaaq tamatumunnga atatillugu piumasaqaataassaaq ilinniartitsineq ilinniartuup ilinniartunik ilinniartitsissusap suleqatigineqarnissaa, tak. inatsimmi § 1, imm. 4. Suleqatigiinnissamik isumaqatigiissut Naalakkersuisunit akuerineqassaaq.

Aalajangersagaq aammattaaq periarfissiivoq folkehøjskolit ilinniartitsinerup sivikinnerusunik ingerlatsinissaannut, soorlu ilinniagaqarsimanngitsunut piginnaasanik inerisaanissamut suliniuummi pikkorissaanerit (PKU), imaluunniit Akuerisaasumik Inuutissarsiummik Ilinnialernissamut Piareersarnerit (AEU), taamaattoqassappallu assersuutigalugu Majoriaq suleqatigineqassaaq, tak. aalajangersakkami imm. 4.

Meeqqat atuarfianni inaarutaasumik naliliinerit siunertaralugit ilinniartitsinerup, ilinniartitsinerup aalajangersakkami taaneqartuni allani piumasaavoq, ilinniartitsineq assersuutigalugu meeqqat atuarfianni, ilinniarnertuunngorniarfimmi imaluunniit qitiusumik inuutissarsiummilluunniit ilinniartitsinerup nalinginnaasumik piumasaqaataasunut nallersuussinnaassasoq.

Ilinniartitsinerup folkehøjskolimi ingerlanneqarnerata ilinniartitsinermut piumasaqaatit allanngortinneqarnissaat nassatarissanngilaa. Allatut oqaatigalugu ilinniartitsinerup pitsaassusaata minnerpaamik assersuutigalugu meeqqat atuarfianni imaluunniit ilinniarnertuunngorniarfimmi ilinniartitsineq assigissavaa, tamatumani højskolit namminneq ilinniartitsinermik ilusilersuisinnaanerata killilinngikkaluarlugu.

Kisianni aalajangersakkami ersinngilaq folkehøjskolit namminneq inaarutaasumik misilitsinnerit ingerlassinnaagaat, ilinniartunut meeqqat atuarfianni inaarutaasumik naliliinernut peqataanissaq siunertarlugu ilinniartinneqartunut naleqqiullugu.

Nalinginnaasumik peroriartuutaasumik ilinniartitsinermut folkeshøjskolit tapiiffigineqartarnerat:

Inatsisartut inatsisaanni atuuttumi § 14, imm. 1-imi folkehøjskolit nalinginnaasumik peroriartuutaasumik ilinniartitsinermut tapiiffigineqarsinnaanerannut piumasaqaatit saqqummiunneqarput.

Ilaatigut piumasaqaataavoq, folkehøjskolip minnerpaamik sapaatip-akunnerini 36-ni ilinniartitsinerit tapiiffigineqarsinnaasut ingerlatissagai, højskolernut marlunnut agguassat. Saniatigut piumasaavoq højskolerneq minnerpaamik sapaatip-akunnerinik 13-inik sivisussuseqassasoq. Tamatumunnga pissutaavoq kissaatigineqarmat ilinniagaqarnerisqaarneq pillugu malittarisassanut ataqatigiissaanissaq, tassami taamaallaat ilinniagaqarnerisqaartitsisoqarsinnaavoq ilinniakkanut minnerpaamik qaammatinik pingasunik sivisussusilinnut, tak. Namminersorlutik Oqartussat ilinniagaqarnerisqaarneq pillugu nalunaarutaat. Aammattaaq piumasaavoq, folkehøjskolit ataasiakkaat minnerpaamik 20-nik ukioq naallugu ilinniartoqarnissaat. Aalajangersakkap oqaasertalernera naapertorlugu piumasaqaatit sisamaasut tamarmik piviusunngortittariaqarput. Kiisalu § 14, imm. 2-mi nassuiarneqarpoq ukioq naallugu ilinniartoq qanoq paasineqassanersoq, aalajangersakkamilu imm. 3-mi aalajangerneqarluni tapiissutit naatsorsorneqassasut ukioq naallugu ilinniartut sapaatip-akunnerisalu ilinniartitsiffiusut tapiiffigineqarsinnaasut amerlassusaat aallaavigalugit. Taamaalilluni maanna aaqqissuussinerup Folkehøjskolit ingerlatsinissaminnik eqaatsumik pilersarusiornissaat annertuumik killilerpaa.

Ilutigisaanik § 14, imm. 4-mi ersippoq, Naalackersuisut tapiissutit naatsorsornerat, tunniunneqartarnerat aqutarinerallu pillugit malittarisassanik aalajangersaasinnaasut. Aammattaaq aalajangersakkamut oqaaseqaatini ersippoq, siunertarinqartoq tapiissutit naatsorsornissaannut malittarisassat aningaasanut inatsimmi aningaasaliussanut naapertuuttuussasut, ilinniarfiit imm. 1-imi piumasaqaatit piviusunngorpatigut. Kisianni pisinnaatitsissut atorineqarnikuunngilaq.

Aammattaaq Naalackersuisut taxameteri malillugu tunniussisinnaaneq ingerlatsinissarlugu pillugit malittarisassanik aalajangersaasinnaanerata inatsimmi tunngavissinneqanngilaq.

Aamma Inatsisartut inatsisaanni atuuttumi, ilinniartut folkehøjskolit tapiissutisissutigisartagaasa højskolernermut namminneq akiliuteqartanninnissaat pillugu aalajangersagaqanngilaq.

Kiisalu aalajangersagaq ilinniartut tapiiffigineqarsinnaasut aningaasanut inatsimmi amerlanerpaaffissaannik aalajangersaasoqarsinnaanera pillugu malittarisassanik imaqaanngilaq.

Ilinniagaqarnersiat aamma ilinniartut akiliutaat:

Folkehøjskolit pillugit inatsimmi § 20, imm. 1-imi ersippoq, ilinniartunut tapiiffigineqarsinnaasumik folkehøjskolertunut, ilinniagaqarnersiuteqarnissamullu piunasaqaatinik piviusunngortitsisunut ilinniagaqarnersiuteqartitsisoqarsinnaasoq, Aammattaaq akerlianik aalajangersakkami naggatit aappaatigut takuneqarsinnaavoq, ilinniarnermut tapiissuteqartoqarsinnaanngitsoq assersuutigalugu Nunatta Karsianit ilinniarnermut attartugassarsititsinikkut, pigisat angallanneqarnerinut imaluunniit folkehøjskoliniinnernut atatillugu aasakkut akiliunneqarluni angalanernut. Akerlianilli ilinniarnermi tapit allat periarfissaqarput, soorlu ilinniarnernup aallartinnerani, unitsinnerani naammassineraniluunniit imaluunniit ilinniartup qanigisaasa perulunneranni toquneranniluunniit akiliunneqarluni angalanerit, tak. Ilinniagaqarnersiat pillugit malittarisassat. Aammattaaq erseqqissumik tunngavissaqarpoq nerisaqarnermut ineqarnermullu akiliutip ilinniagaqarnersianit ilanngaanneqarnissaa. Taamaalilluni naggatit aappaat taamaallaat ilinniagaqarnersianut immikkut aalajangersakkanut akiliunneqarluni angalanissanut aalajangersakkami taaneqartunut periarfissiivoq.

Aammattaaq Inatsisartut inatsisaanni atuuttumi § 20, imm. 2-mi ersippoq, folkehøjskolimi akuerisaasumi siulersuisut inassuteqarnerat tunngavigalugu, folkehøjskolernerillu ilinniartut nalinginnaasumik peroriartuutaasumik ilinniartinneqarfigisaannik minnerpaamik sapaatip-akunnerinik 13-inik sivisussuseqarpara, Naalakkersuisut ilinniartup sapaatip-akunneranut nammineerluni akiliutissaa aalajangersassagaat.

Periuserineqartoq imaannikuuvoq, folkehøjskolit sapaatip-akunneranut ilinniartup akiliutissaanik inassuteqaateqartarlutik, KANUKOKA-mut saqqummiunneqartumik, tamatumalu kingorna Naalakkersuisut – imaappoq Kultureqarnermut, Ilinniartitaanermut, Iisimatusarnermut Ilageeqarnermullu Naalakkersuisoqarfiup – KANUKOKA-llu akornanni isumaqatigiissuteqartoqartarluni.

Tamatumunnga atatillugu naalakkersuisoqarfik, ilinniartut akiliutissaat pillugu taamaallaat folkehøjskolimiinnernut sivisunerusunut – imaappoq minnerpaamik sapaatip-akunnernik 13-inik sivisussusilinnut – tunngatillugu isumaqatigiissuteqarsinnaavoq. Sivikinnerusumik højskolernernut atatillugu naalakkersuisoqarfik oqartussaataitaanngilaq. Ilutigisaanillu kommunit sivikinnerusumik højskolernernut ilinniartut akiliutaasa ilaannik akiliinissamut

pisussaaffeqanngillat. Tamatumunnga atatillugu ilisimatitsissutigineqarsinnaavoq ilinniartup akiliutissaa sapaatip-akunneranut 365 kr-nut aalajangiunneqartarsimammat.

Kiisalu inatsimmi § 20, imm. 3-mi ersippoq Kalaallit Nunaanni Kommuneqarfiit Kattuffiat siunersioreerlugu Naalakkersuisut aalajangertassagaat imm. 2-mi ilinniartup akiliutissaata akuerineqartup ilaa qanoq angitigisoq ilinniartumit namminermit akilerneqartassanersoq aammalu qanoq angitigisoq kommunimit najugaqarfigisaanit akilerneqartassanersoq. Periuseq atorneqartoq naapertorlugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup – Naalakkersuisut sinnerlugit – folkehøjskolit ilinniartut akiliutissaasa annertussusissaat pillugu inassuteqaataat, KANUKOKA-mut saqqummiuttarpaa. Aalajangersakkami piumasaavoq naalakkersuisoqarfik KANUKOKA-lu isumaqatigiittassasut, ilinniartup akiliutissaata kommunimit akilerneqartussap ilinniartumillu akilerneqartussat qanoq agguaannissaat pillugu.

Peqataasut annikitsumik akiliuteqartarnerannik maanna aaqqissuussineq, folkehøjskolit amerlasuunik ilinniartunngortitsisarnissaannut kaammattuutaanngilaq aningaasaqarnikkullu naammattumik tunngavissianani. Atuisut akiliutaasa piviusut malinnagit appasitsitaasup ersiutigaa politikikkut kissaatigineqarmat innuttaasut tamarmik folkehøjskolersinnaanissaat, aningaasaqarnikkut inissisimanertik apeqqutaatinnagu, tamannalu tunngaviatigut tapiissutitigut taparserneqarpoq. Tunngaviusumik aningaasaliissutaasartut minnerpaamik ingerlatassatut piumasaqaatinut naleqqiullugit annertoqaat, assersuutigalugulu ukiumoortumik ilinniartunik 20-nik ingerlatsinermik matussusiilluarsinnaalluni. Kisianni annertuumik ingerlatsinermi (soorlu ukiumoortumik ilinniartut 60-iuppata) højskolinut aningaasaqarnikkut napaniarneq ajornassaaq, tassami ilinniartut ilinnialersut tamarmik ilanngaattissat ilanngaatigereerlugit aningaasartuutaalissammata, atuisutut akiliutit aningaasartuutit nikerartut piviusut matussusernissaannut naammangivittussaammata.

Taamaammat maannakkut aaqqissuussineq annikitsumik ingerlatsinissaannarmut kaammattuutaavoq, tamatumalu nassataraa ukiumoortumik ilinniartumut ataatsimut aningaasartuutit qaffasinnerat. Ukiumoortumik ilinniartumut ataatsimut aningaasartuutit annikillisarneqarsinnaapput ataatsimut ingerlassat annertusarnerisigut, tassami ilimagisariaqarmat folkehøjskolit sullissivii (aningaasaqarnermut, allaffissornikkut, igaffik il.il.) annikitsuinnarmik annertusisariaqassasut, ingerlassat allat annertusigaluarpataluunniit.

b) Siunnersuut

Siunnersuummi § 1, imm. 1-imi naggatit aappaanni erseqqissarneqarpoq ilinniartitsissutinik ataasiakkaanik imaluunniit ilinniartitsissutinik ataatsimoortunik salliunerusumik inissiisinaanermik periarfissamut ilaasut ilinniartitsissutit, nalinginnaasumik peroriartuutaasutut inuunermik paasititsiniaanermut, inuttut paasititsiniaanermut, demokratiskimik peroriartornermut inuttullu ineriartornermut tunngaannaratik aammali allanut tunngassuteqartut. Tassunga atatillugu tamannalu pillugu Sulisartut Højskoliannit

siunnersuut tunngavigalugu, siunnersuutigineqarpoq, aammattaaq ingerlassat tigussaannerusut aalajangersakkamut tassunga ilaassariaqartut.

Aammattaaq siunnersuutip nassataraa, folkehøjskolit meeqqat atuarfianni inaarutaasumik naliliineq siunertaralugu ilinniartitsinerit, ilinniartitsinernik ilinniakkanut ingerlaqqiffiusinnaasunik allanik ingerlatsinerit aamma ilinniarnertuunngorniarfimmi iliniartitsissutit ataasiakkaat ilinniartitsissutiginerisa inuutissarsiutinilluunniit tunngaviusumik ilinniartitsinerit saniatigut aammattaaq meeqqat atuarfianni inaarutaasumik misilitsinnernik ingerlatsisinnaanerat. Taamaattoq tamatumunnga atatillugu piumasaqaataavoq, meeqqat atuarfianni inaarutaasumik misilitsinnerit, suliffeqarfik oqartussaasulluunniit ilinniartitsinernik nalinginnaasumik neqerooruteqartartuusut suleqatigalugit ingerlanneqartassasut. Saniatigut isumaqatigiissut Naalakkersuisunit akuerineqartariaqarpoq.

Aammattaaq inatsimmi erseqqissumik taaneqassaaq, folkehøjskolit – tamanna pillugu avataani ingerlatsisut isumaqatigiissuteqarfigereerlugit, ilinniartitsinernik ingerlatsinerit inatsimmi § 1, imm. 1-3-mi taaneqartut saniatigut allanittaaq neqerooruteqarsinnaasut.

Inatsimmi § 14-ip nutaamik oqaasertalerneranut aallaaviuvoq, sapaatip-akunnerisa ilinniartoqarfiit minnerpaamik 700-uunissaat, tamatumunngalu siunnersuummi § 20, imm. 1 tapertaavoq, tassani piumasarineqarmat folkehøjskolerneq tapiiffigineqarsinnaasooq minnerpaamik sapaatip-akunnerinik 10-nik sivisussuseqassasooq. Tamatuma kinguneraa tapiiffigineqarsinnaasunik minnerpaamik sapaatip-akunnerini 36-ni ilinniartitsinissamik aamma folkehøjskolernerit tamarmik minnerpaamik sapaatip-akunnerinik 13-inik sivisussuseqarnissaannik piumasaqaatit maanna atuuttut atorunnaarsinneqarnerat. Taamaapportaaq tapiiffigineqarsinnaasumik ilinniartitsinermi ukiumoortumik ilinniartut minnerpaamik 20-unissaannik piumasaqaammut tunngatillugu. Tamakku kingunerannik ukiumoortumik ilinniartup nassuiaataa § 4, imm. 2-miittoq atorunnaarpoq aamma § 14, imm. 3-mi tapiissutit ukiumoortumik ilinniartut amerlassusaat aamma sapaatip-akunnerisa tapiiffigineqarsinnaasut amerlassusaat aallaavigalugit naatsorsornissaannik piumasaqaat atorunnaarpoq. Tamatumunngalu uiggiutiinnarlugu § 14, imm. 3-mi pisinnaatitsissummik aalajangersagaq aammattaaq atorunnaarluni. Paarlaallugu siunnersuutigineqarpoq aalajangersagaq taanna § 14, imm. 3-mik nutaamik taarserneqassasooq, taannalu malillugu inatsisitigut aalajangersaaneq inatsimmi toqqaannartumik pissaaq, nalunaarusiorani. Saniatigut aalajangersagaq ilaneqarpoq, Naalakkersuisut taxameteri malillugu tapiissutit tunniunneqartarnerat allaffissiornikkullu aqutarinerat pillugit malittarisassanik aalajangersaasinnaanngortillugit.

Taxameteri malillugu tapiissutit paasineqassapput ingerlatat apeqqutaatillugu aningaasaliisarnertut, ersarinnerusumik ilusilersorneqarnissaa Inatsisartunut suliassaatinneqartoq, aningaasanut inatsit naapertorlugu. Tamatuma assigaa folkehøjskolit qularnaassagaat suliniutit ingerlatat apeqqutaatillugu aningaasalersuisoqartarnissaa, annertussutsit Namminersorlutik Oqartussanit aningaasanik inatsisikkut ukiut tamaasa

aalajangersarneqartartut naapertorlugit. Taamatut suliniutit aalajangersimasut tigussaasut naapertorlugit tunngavissaareersut naapertorlugit aningaasalersuisarneq, aamma taxameterimut akiliuteqartarnertut taaneqartalersoq, annertussuseq ilinniartukkaartumik akilerneqartarluni ilinniakkami aalajangersimasumi. Aningaasalersueriaaseq taanna aamma inuussutissarsiutinut ilinniartitaanerni ilisimaneqarpoq. Kiisalu aamma ilutsit assigiinngitsut katitserlugit aningaasaliissuteqartarnerit ilinniartinnut atorineqarajupput, tunngaviusumik tapiissutitut, taxameterimut aningaasaliissutitut aammalu immaqa immikkut ittunik aningaasaliissutissatut immikkoortitatut aqqissuussanik, taamalu ataatsimoortumik tapiissutitsigut qularnaarneqartarluni ingerlatsivimmi pineqartumi aalajaatumik aningaasalersorneqarneq, politikikkut aalajangigaasunut anguniakkanut. Tamanna aamma atuuppoq maanna inatsisini atuuttuni.

Aammattaaq siunnersuummi § 14, imm. 4-mi erseqqissarneqarpoq, ilinniartut tapiissutisissutigineqartartut namminneq akileeqquneqarsinnaanngitsut, aammattaaq Naalakkersuisut aningaasanut inatsimmi ilinniartut tapiiffigineqarsinnaasut amerlanerpaaffilersinnaagaat aalajangersarneqarpoq, tak. siunnersuummi § 14, imm. 5.

Taamaalilluni § 14-ip oqaasertassaasut siunnersuutaasutigut anguniarneqarpoq, Namminersorlutik Oqartussat aningaasaliissutaasa ingerlassallu piviusut imminnut ataqatigiinnissaat, tamatumalu ilutigisaanik qularnaassavaa inissat atorluarneqarnerunerat. Tamanna pissaaq § 14, imm. 1 naapertorlugu ingerlatsinermut tapit aamma § 14, imm. 3-mi taxameteri malillugu tapiissutit imminnut ataqatigiinnerisigut.

Aamma siunnersuummi § 20, imm. 1-imi ersippoq, ilinniartut ilinniagaqarnerisiaqarsinnaassagunik minnerpaamik sapaatip-akunnerini 10-ni tapiiffigineqarsinnaasumik højskolissasut, maanna sapaatip-akunnerini 13-ini højskolernissamik piumasagaataasup akerlianik. Sapaatip-akunnerini 13-ini højskolernissamik piumasagaammut maanna atuuttumut pissutaavoq, ilinniagaqarnerisiaqartarneq pillugu malittarisassanut tamanna pillugu Namminersorlutik Oqartussat nalunaarutaanniittunut naleqqusaanissamik kissaateqarneq. Tamannali pisariaarutissaaq, siunnersuummi erseqqissumik allaqqappat folkehøjskolernerimi ilinniagaqarnerisiaqartitsisoqarsinnaasooq. Taamaakkaluartoq siunertamut naapertuuttutut isigineqarpoq højskolernerup sapaatip-akunnerinik 10-nik sivisussuseqarnissaanik piumasagaateqarnissaaq, tassuunakkut pinngitsoorumallugu højskolernerit pisariaqanngitsumik sivikinninngorlugit aggulunneqarnissaat, tassuunakkullu akiliunneqarluni angalanernut aningaasartuutit amerlinissaat.

Aammattaaq siunnersuummi § 20, imm. 1-imi naggatit aappaanni erseqqissarneqarpoq, aningaasanut inatsimmi folkehøjskoliniinnernut immikkut aningaasaliussanik aalajangersaasoqartassasooq. Tassunga atatillugu naatsorsuutigineqarpoq tapiissutit maanna aningaasaliussaasartunit ikinnerussasut, tamatumalu siunertaraa atuisut akiliuteqartarnerata

peerneqarnissaa. Tamatuma kingunerissavaa, folkehøjskolimiinneq, ineqarneq nerisaqarnerlu ilanngullugit, ilinniartunut tapiissutisissutigineqartunut akeqassanngimmat.

Aammattaaq § 20-mut oqaasertaliussassatut nutaatut siunnersuummi ersippoq, folkehøjskolip inassuteqaataa tunngavigalugu, Naalackersuisut ilinniartut sapaatip-akunneranut akiliutigisartagassaannik aalajangersaasernerat pillugu aalajangersagaq atorunnaassasoq. Assigisaanik maanna aalajangersakkami imm. 3 aammattaaq atorunnaassaaq, tassalu KANUKOKA siunersioreerlugu Naalackersuisut aalajangertassagaat imm. 2-mi ilinniartup akiliutissaata akuerineqartup ilaa qanoq angitigisoq ilinniartumit namminermit akilerneqartassanersoq aammalu qanoq angitigisoq kommunimit najugaqarfigisaanit akilerneqartassanersoq, ilinniartunut § 1, imm. 1-imi pineqartunut atatillugu.

Aammattaaq qulaani Aallaqqaasiussami allaaserisaaq aamma siunnersuummi aalajangersakkanut ataasiakkaanut oqaaseqaatit innersuunneqarput.

Inatsisissatut siunnersuut inatsimmut atuuttumut sanilliullugu	
	§ 1
	Folkehøjskolit pillugit Inatsisartut inatsisaanni nr. 24, 18. november 2010-meersumi makku allanngortinneqassapput:
Folkehøjskolit nalinginnaasumik peroriartuutaasumik atuartitsinerup iluani atuartitsissutit ataasiakkaat imaluunniit atuartitsissutit ataatsimoortut sallitissinnaavaat.	1. § 1, imm. 1, naggatit aappaat ima oqaasertalerneqassaaq: ”Folkehøjskolit nalinginnaasumik peroriartuutaasumik ilinniartitsinerup iluani, ilinniartitsissutit ataasiakkaat imaluunniit ilinniartitsissutit ataatsimoortut, taakkununga ilanngullugit timersorneq, nerisassiorneq imaluunniit ilinniartitsissutit sullivilinnut sammisut, salliunerusumik inississinnaavaat”.
<i>Imm. 3.</i> Folkehøjskolit ilinniartitsineq misilitsinnissaq siunertaralugu ilinniartitsinerup ilaqartoq neqeroortigisinnaavaat, malittarisassat atuuttut naapertorlugit meeqqat atuarfianni inaarutaasumik naliliinerit ilaannut peqataanissaq, ilinniakkani allani ilinnialissutaasinnaasumik ilinniartinneqarnissaq, inuutissarsiutinik tunngaviummik ilinniartitsinerup iluani ilinniartinneqarnissaq aamma	2. § 1, imm. 3, naggat siulleg ima oqaasertalerneqassaaq: ”Folkehøjskolit ilinniartitsineq, misilitsinnissamut piareersaataasumik ilinniartitsinerup ilaqartoq, neqeroortigisinnaavaat, meeqqat atuarfianni inaarutaasumik naliliinerup ilaanik ingerlatsinissaq siunertaralugu, tamatumunnga ilanngullugit inaarutaasumik misilitsinnerit, ilinniartitsinerit ilinniakkanut ingerlaqqiffiusinnaasut allat,

<p>ilinniarnertuunngorniarfimmi atuartitsissutininik ataasiakkaanik ilinniartinneqarnissaq siunertaralugit. Ilinniartitsinerup ilinniakkami pineqartumi nalinginnaasumik piumasaqaataasut nallersorsinnaassavai.</p>	<p>inuutissarsiuutinik tunngaviusumik ilinniartitsinerup iluani ilinniartitsineq aamma ilinniarnertuunngorniarfimmi iliniartitsissutit ataasiakkaat ilinniartitsissutiginerat, pineqartut pillugit malittarisassat atuuttut naapertorlugit.”</p>
<p><i>Imm. 4.</i> Folkehøjskolerit ilinniartitsinerimik imm. 3-mi taaneqartumik aallartitsinerat pisassaaq ilinniartitsinerimik imaluunniit oqartussaasumik nalinginnaasumik ilinniakkamik pineqartumik neqerooruteqartartuusumik suleqatigiinnissamik isumaqatigiissuteqarneq tunngavigalugu. Isumaqatigiissut Naalakkersuisunit akuerineqassaaq.</p>	<p>3. § 1, imm. 4, naggammi siulleq ima oqaaseralerineqassaaq: ”Folkehøjskolerit ilinniartitsinerimik inaarutaasumillu misilitsinnernik imm. 3-mi taaneqartumik aallartitsinerat pisassaaq, ilinniartitsinerimik oqartussaasunilluunniit, ilinniakkamik pineqartumik nalinginnaasumik neqeroortartumik, suleqatigiinnissamik isumaqatigiissuteqarneq tunngavigalugu”.</p>
<p><i>Imm. 5.</i> Naalakkersuisut imm. 1-4-imi aalajangersakkat pillugit erseqqinnerusumik malittarisassaliorsinnaapput.</p>	<p>4. § 1-imi, imm. 4-p kingorna immikkoortutut nutaatut ikkunneqassaaq: ”Imm. 5. Folkehøjskolerit ilinniartitsinerimik ingerlatsinerit imm. 1-3-mi taaneqartumit allaanerusut neqeroorutigisinnaavaat, ingerlatsisut allat tamanna pillugu isumaqatigiissuteqarfigereernerisigut.”</p> <p>Imm. 5 tamatuma kingorna tassaalissaaq imm. 6 imatullu oqaasertalerineqassaaq: ”Imm. 6. Naalakkersuisut imm. 1-5-imi aalajangersakkat pillugit erseqqinnerusumik malittarisassaliorsinnaapput.”</p>
<p>§ 14. Ilinniartunut § 1, imm. 1-imi pineqartunut Naalakkersuisut Inatsisartut Aningaasanut Inatsisaanni aalajangersarneqartut iluanni folkehøjskolerit tapiissuteqartassapput, 1) minnerpaamik sapaatip-akunnerini 36-ni tapiiffigineqarsinnaasumik ilinniartitsisoqarpat, 2) ilinniartitsineq annerpaamik marloriarluni folkehøjskolerit aaqquussaaq, 3) folkehøjskolerit tamarmik minnerpaamik sapaatip-akunnerinik 13-inik sivisussuseqarpat, aamma</p>	<p>5. § 14 ima oqaasertalerineqassaaq: ” § 14. Ilinniartunut § 1, imm. 1-imut ilaasunut, Naalakkersuisut, aningaasanut inatsimmi aningaasaliussatut aalajangersakkat iluanni, folkehøjskolerit ingerlatsinerimut tapiissuteqartassapput, ullorsiuutinik malillugit ukiup ingerlanerani sapaatip-akunnerini ilinniartoqarfinni minnerpaamik 700-ni ilinniartinneqarsimappata. Sapaatip-akunera ilinniartoqarfik ataaseq tassaavoq ilinniartup ataatsip sapaatip-akunnerani ataatsimi ilinniartinneqarnera.</p> <p><i>Imm. 2.</i> Naalakkersuisut taxameteri</p>

<p>4) tapiiffigineqarsinnaasumik ilinniartitsinermik ingerlatsinerup iluani ukioq naallugu ilinniartut minnerpaamik 20-uppata.</p> <p><i>Imm. 2.</i> § 1, imm. 1 naapertorlugu ukioq naallugu ilinniartoq tassaavoq ukiup ataatsip ingerlanerani sapaatip-akunnerini 36-ni ilinniartorisaaq ataaseq.</p> <p><i>Imm. 3.</i> Tapiissutit naatsorsorneqassapput ukioq naallugu ilinniartut sapaatip-akunnerisalu ilinniartitsiffiusut tapiiffigineqarsinnaasut amerlassusaat aallaavigalugit.</p> <p><i>Imm. 4.</i> Naalackersuisut tapiissutit naatsorsornerat, tunniunneqartarnerat aqutarinerallu pillugit malittarisassanik aalajangersaasinnaapput, tamatumunnga ilanngullugit ukioq naallugu ilinniartut ikinneruneranni sapaatillu-akunnerisa ilinniartitsiffittut naammassisat ikinneruneranni tapiissutit ikilisinneqarsinnaanerat pillugu aalajangersakkat.</p>	<p>malillugu tapiisarput, tamatumani aallaavigissallugit folkehøjskolimi sapaatip-akunneri ilinniartoqarfiit, akigitamik ukiut tamaasa aningaasanut inatsimmi sapaatip-akunneranut ilinniartoqarfimmut ataatsimut aalajangiunneqartartumik amerlisarneri.</p> <p><i>Imm. 3.</i> Folkehøjskolip sapaatip-akunneri ilinniartoqarfiit imm. 1-imi aalajangiunneqartut amerlassuseqartut ingerlassimannikkunigit, ingerlatsinermut tapit naleqqiussinikkut utertissavai. Utertillugit akiliutissat ingerlatsinermut tapit tunniunneqarsimasut aalajangersimasumik procentiattut annertussuseqassapput, taannalu aalajangerneqassaaq sapaatip-akunneri ilinniartoqarfiit imm. 1-imi minnerpaaffissaat eqqaaneqartut naapertorlugit ingerlanneqarsimannigitsut procentinngornerat naapertorlugu. Naalackersuisut taxameteri malillugu tapiissutit tunniunneqartarnerat allatigullu allaffissornikkut ingerlannerat pillugit malittarisassanik aalajangersaasinnaapput.</p> <p><i>Imm. 4.</i> Ilinniartunit, folkehøjskolit ilinniartunut tapisissutisissutigisartagaannit, nammineq akiliuteqarnissaaq piumasarineqarsinnaanngilaq.</p> <p><i>Imm. 5.</i> Ilinniartut tapiissutisissutigineqarsinnaasut amerlanerpaaffissaat Inatsisartut aningaasanut inatsimmi aalajangersarsinnaavaat.”</p>
<p>§ 20. Ilinniartut § 1-imi pineqartut tapiiffigineqarsinnaasumillu sivikinnerpaamik sapaatip-akunnerini 13-ni folkehøjskolimiittut ilinniagaqarnersiutit pillugit nalunaarummi malittarisassat naapertorlugit ilinniagaqarnersiaqassapput. Taamaattoq ilinniagaqarnersiaqarneq taamaallaat pisinnaavoq, ilinniartup ilinniarnermi aallartinnerani, unitsitsinerani naammassineranilu angalanerminut</p>	<p>6. § 20, ima oqaasertalerneqassaaq: ” § 20. Ilinniartut § 1-imut ilaasut, tapiiffigineqarsinnaasut minnerpaamik sapaatip-akunnerini 10-ni folkehøjskoliniittut, ilinniagaqarnersiaqarneq pillugu nalunaarummi aalajangersakkat naapertorlugit ilinniagaqarnersiaqassapput. Taamaattoq taamaallaat ilinniagaqarnersiat tassaasinnaapput ilinniarnernup aallartinnerani, unitsinnerani, tamatumunnga</p>

<p>akiliunneqarneratut aamma nerisaqarnermut ineqarnermullu akiliutissat ilanngaatereerlugit ikiorsiissutisiatut.</p> <p><i>Imm. 2.</i> Folkehøjskolit akuerisaasut siulersuisuinit inassuteqaateqartoqareerneratigut, Naalakkersuisut folkehøjskolimi sivikinnerpaamik sapaatip-akunnerini 13-inik sivisussuseqartumik ilinniartut, § 1, imm. 1-imi pineqartut, sapaatip-akunneranut akiliutigisartagassaat aalajangertassavaat.</p> <p><i>Imm. 3.</i> Kalaallit Nunaanni Kommuneqarfiit Kattuffiat siunersioreerlugu Naalakkersuisut aalajangertassavaat imm. 2-mi ilinniartup akiliutissaata akuerineqartup ilaa qanoq angitigisoq ilinniartumit namminermit akilerneqartassanersoq aammalu qanoq angitigisoq kommunimit najugaqarfigisaanit akilerneqartassanersoq, ilinniartunut § 1, imm. 1-imi pineqartunut atatillugu.</p>	<p>ilanngullugu ilinniartup qanigisaani pinartumik napparsimasoqartillugu toqusoqartilluguluunniit, ilinniarnerullu naammassinerani akiliunneqarluni angalanerit, kiisalu folkehøjskolernerumut immikkut aalajangiussamik ilinniagaqarnerisartitit nerisaqarnermut ineqarnermullu ilanngaanneqartut.”</p>
	<p style="text-align: center;">§ 2</p> <p>Inatsisartut inatsisaat atuutilissaaq 1. januar 2018.</p>

3. Aningaasaqarnikkut ingerlatsinikkullu pisortanut kingunerisassai

Inatsisissatut siunnersuummi takuneqarsinnaasutut tunngaviusumik tapiissutit aamma taxameteri malillugu tapiissutit aningaasanut inatsimmi aalajangiunneqartartussaapput. Tamatuma nassataraa siunnersuutip aningaasaqarnikkut kingunerisassaanut apeqqutaassammata Inatsisartut aningaasanut inatsimmi tapiissutit annertussusissaattut aalajangiussaata.

Aningaasaqarnikkut kingunerisassat matumani misissornissaannut atatillugu makku ilimagisatut tunngavigineqarput:

- Folkehøjskolinut marluusunut tamanut immikkut tunngaviusumik tapit 4 mio. kr-iusut,
- Sapaatip-akunneranut ilinniartoqarfiusumut taxameteri naapertorlugu tapit: 2.500 kr.,
- Qaammammut ilinniagaqarnerisutit aningaasartaat: 2.000 kr. (maanna 4.600 kr-usut)
- Ukiumut ilinniartutut katillugit: 110. Kisitsimmut tassunga aallaaviupput folkehøjskolit marluusut periusissiaminni piffissamut ungasinnerusumut naleqqiullugu kissaatigisamittut nalunaarutigisaat. Annertuumik ingerlatsineq anguneqarsinnaanngilaq, inatsisinut atuuttunut naleqqiullugu aningaasaqarnermik pissuteqarluni.

Ilinniartut 110-utillugit ingerlatsinermi højskolinut tapiissutit katillugit 17.600.000 kr. missaanniissapput, 2017-imut aningaasanut inatsimmi tapiissutit 12.229.000 kr-iusut. Aningaasartuutaanerussat 5.370.000 kr-iusut ilimagineqarpoq ima aningaasalersorneqassasut:

- Kommuninut ataatsimoortumik tapiissutit ikilinerat, kommunit ilinniartut akiliutaannut tapiissusaatitaajunnaarnerisa kingunerisaanik: 1.200.000 kr.
- Ilinniagaqarnersiat nutaamik aningaasartalernerisigut ikilisaatit: 1.100.000 kr.
- Inuusuttunut suliniutinut maanna atuuttunit nuussinerit 3.071.000 kr.

Naalackersuisut naatsorsuutigaa 2018-imut Aningaasanut Inatsisissamut Siunnersuummi siunnersuutigissallugu, inuusuttunut suliniutinut aningaasaliissutit kontomi pingaarnemit 20.11.70, 2017-imi suliniutinut nutaanut sillimmatinit, Folkehøjskolit kontoannut pingaarnermut naapertuuttumik annertussusilimmik nuunneqassasut.

Siunnersuut ukiumut ilinniartut katillugit 60-it missaanniikkaangata pisortanut aningaasartuutaanerussanngitsoq naatsorsuutigineqarpoq. Tamanna sanilliunneqassaaq inatsisit maanna atuuttut tunngavigalugit højskolini ukiumut ilinniartut minnerpaamik 40-nerannut.

Knud Rasmussenip Højskoliata illutai Namminersorlutik Oqartussanit pigineqarput. Taakku maanna nutarterneqarput ilimagisaavorlu 1 januar 2018 piariissasut, ukioq naallugu ilinniartut 50-it 60-illu akornanniittut inissaqartissinnaangorlugit. Sulisartut Højskoliata illutani nammineq pigivai, aamma Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfimmut nalunaarutigalugu, aningaasaateqarfinnut il.il. qinnuteqaatit ingerlasut, illut nutarternissaat siunertaralugu, tassuunakkut ukioq naallugu ilinniartut 50-it 60-illu piffissami ungasinnerusumi inissaqartissinnaajumallugit. Tamatuma piviusunngortinnissaanut piffissaliussaqaqngilaq.

1. januar 2018-imi folkehøjskolit tamakkiisumik inissamik atuisinnaangippata, inatsisissatut siunnersuutip matuma aningaasartuutitassai, tamakkiisumik inissamik atuisinnaalernissap tungaanut qulaani saqqummiunneqartunit appasinnerussapput.

4. Inuutissarsiutinik ingerlatsisunut aningaasaqarnikkut ingerlatsinikkullu kingunerisassai

Inuutissarsiutinik ingerlatsisunut aningaasaqarnikkut ingerlatsinikkullu kinguneqarnissaa ilimagineqangilaq.

5. Avatangiisinut, pinngortitamut peqqissutsimullu kingunerisassai

Inatsisissatut siunnersuut avatangiisinut, pinngortitamut peqqissutsimullu kinguneqassanngilaq.

6. Innuttaasunut kingunerisassai

Siunnersuutip nassatarissavaa innuttaasut folkehøjskolimi ilinnialerusuttut, folkehøjskolit tapisissutigisartagaasa, ilinniartuunerminni akiliuteqassammata. Siunnersuutip kaammattuutaasumik ilusaata aammattaaq ilimagineqarpoq ilutigisaanik nassatarissagaa, amerlanerit højskolertalernissaat, højskolillu annerusumik inissamik atuinissamik soqutiginnilernissaat.

7. Kingunerisassat pingaarutillit allat

Inatsisissatut siunnersuut Naalagaaffeqatigiinnermut imaluunniit namminersornerup piviusunngortikkiartornerata ingerlateqqinneranut sunniuteqassanngilaq.

8. Pisortanut kattuffinnullu tusarniaaneq

Inatsisissatut siunnersuut piffissami 19. december 2016-imiit 24. januar 2017-imut ukununga tusarniaassutigineqarpoq:

Naalakkersuisut Siulittaasuata Naalakkersuisoqarfia

Aningaasaqarnermut Akileraartarnermullu Naalakkersuisoqarfik

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu

Naalakkersuisoqarfik

Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik

Peqqissutsimut Nunanillu Avannarlernik Suleqateqarnermut Naalakkersuisoqarfik

Aalisarnermut Piniarnermullu Naalakkersuisoqarfik

Inuussutissarsiornermut, Suliffeqarnermut, Niuernermut Nukissiuuteqarnermullu

Naalakkersuisoqarfik

Aatsitassanut Ikummatissanullu Naalakkersuisoqarfik

Sulisitsisut (GE)

Knud Rasmussenip Højskolia

Sulisartut Højskolia

SIK

KANUKOKA

NUSUKA

IMAK

AK

ASG

Ilisimatusarfik

Avannaani Ilinniarnertuunngorniarfik/Nordgrønlands Gymnasium

Qeqqani Ilinniarnertuunngorniarfik/Midtgrønlands Gymnasium

Campus Kujalleq

Kalaallit Nunaanni Teknikimik Ilinniarfik (KTI)

INUILI

Imarsiornermik Ilinniarfik

NI-Nuuk
Peqqissaanermik Ilinniarfik
Perorsaanermik Ilinniarfik
Nunalerinermik Ilinniarfik
Eqqumiitsuliornermik Ilinniarfik
Kalaallit Illuat, Århus
Kalaallit Illuat, Odense
Kalaallit Illuat, Aalborg
Kalaallit Illuat, København
Qaasuitsup Kommunia
Kommuneqarfik Sermersooq
Kommune Kujalleq
Qeqqatta Kommunia
Nuuk Internationale Friskole
Avalak
ILI ILI
KIK
Nuna Tamakkerlugu Iitersuisarfik
MIO

Tusarniaanermut killiussaq naammat akissutit ukunannga tiguneqarput:

GU-Aasiaat, SIK, Kommune Kujalleq, Kommuneqarfik Sermersooq, Knud Rasmussenip Højskolia, IMAK, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik, KANUKOKA, GA, Aningaasaqarnermut Akileraartarnermullu Naalakkersuisoqarfik aamma Kommuninut, Nunaqarfinnut, Isorliunerusunut, Attaveqaqatigiinnermut Inissianullu Naalakkersuisoqarfik.

Kommune Kujalliup ilaatigut tikkuarpaa pisariaqartitsisoqartoq assersuutininik arlaqarnerusunik oqaaseqaatini siunnersuummi nr.- 1-imut, sannavinnut sammisunik ingerlatsinernut tunngatillugu, tamannalu ilanngunneqarpoq.

Kiisalu oqaaseqaatit Knud Rasmussenip Højskolianiit, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfimmiit aamma KANUKOKA-miit pissutissaqartitsisimapput siunnersuummi nr. 1-imut, § 1, imm. 5-imut tunngatillugu allannguinnissamik, piumasaqaammut folkehøjskolit ilinniartitaanernik allanik neqerooruteqarsinnaanerannut piumasaqaammut atatillugu, imm. 1-3-mi allassimasuunngitsunik, ingerlatsisut isumaqatigiissuteqarfigereerlugit tamanna pisassasoq pillugu. Maanna erseqqissarneqarpoq ingerlatsisut allat amerlanertigut tassaasartut ingerlatsiviit imaluunniit pisortaqaarfiit il.il. nalinginnaasumik ilinniartitsinernut pineqartunut akisussaasuusut.

Kiisalu KANUKOKA ujartorpa taxameteri atorlugit tapiissuteqartarnerup erseqqissaavigineqarnissaa, tamannalu kinguneqarpoq maanna nalinginnaasumik oqaaseqaatini immikkoortumik pilersitsisoqarneranik tamatuma ersarinnerusumik nassuiarneqarneranik imaqartumik.

Tamatuma saniatigut Kommune Kujalleq, Inuusutissarsiornermut, Suliffeqarnermut, niuernermut Nukissiuuteqarnermullu Naalakkersuisoqarfik aamma Kommuneqarfik Sermersooq apeqqutinik arlalinnik saqqummiussisimapput aningaasalersuisarnissami immikkuualuttut pillugit, tamannalu tusarniaanermut akissutitut tunngatillugu uani ataani allakkiami – nassuiaavigineqarpoq.

Kiisalu Sulisitsisut, Aningaasaqarnermut Akileraartarnermullu Naalakkersuisoqarfiup, Kommuninut, Nunaqarfinnut, Isorliunerusunut, Attaveqaqatigiinnermut Inissianullu Naalakkersuisoqarfiup. GU-Aasiaat taamaattoq nalunaarpoq folkehøjskolit suli annertuumik suliassaqtut pikkorissartut nalinginnaasumik ineriartornerat nukittorsassallugu, tamatumalu inuit pineqartut aqutissiuussinnaagai nunarsuatsinni ataatsimoorneruleriartuinnartumi akuunissaannut, soorluttaaq IMAK nalunaarpoq siunnersuut tikilluaqqunartoq.

Tamatumunngalu atatillugu innersuunneqassaaq ataani uani tusarniaanermi akissutit tamarmik nalunaarsorneqarfigisaat oqaaseqarfigineqarlutillu.

	Tusarniaavigi- neqartoq	Tusarniaavigineqartup oqaaseqaatai	Tusarniaavigineqartup oqaaseqaataanut isummersuutit
1.1	GU-Aasiaat	Siunnersuummut imatut o- qaaseqaatissaqanngilagut, kisianni folkehøjskolit suli pingaarutilimmik suliassaqrput pikkorissartartut nalinginnaasumik tamat ilisimasariaqagaannik pikkorissartut pigisassaannik annertusaanissamik suliassaqarmata, tamatumami pikkorissartut nunarsuarmioqataasutut inooqataanerminni periarfissaannik annertusaaneq periarfississavaa.	Siunnersuummik allannguinnissamut tunngavissiiingilaq.
2.1	SIK	SIK-p iluarisimaarpaa	Siunnersuummik

		<p>siunnersuummi ammaanneqarmat innuttaasut højskolarsinnaaneri, fagini sammisassanilu assigiinngitsuni atuartinneqarumallutik, nalinginnaasumik atuagarsorfiusuni ilinniartitaanerni pissarsiarineqarsinnaanngi- tsunik.</p>	<p>allannguissamut tunnngavissiinnngilaq.</p>
2.2	SIK	<p>Iluarisimaarnarpoq siunner- suummi ammaanneqarmat folkehøjskolertut meeqqat atuarfianni inaarutaasumik misilitsittarneq naammassi- sinnaalissammasuk meeq- qat atuarfiannut innersuun- neqaqqaaratik.</p> <p>Aamma iluarisimaarnarpoq inatsisissatut siunnersuummi periarfissiuunneqarmat højskolit ilinniagassanik allanik nalinginnaasumik neqeroorutaasartut saniatigut neqerooruteqarsinnaaneri.</p>	<p>Siunnersuummik allannguissamut tunnngavissiinnngilaq.</p>
2.3	SIK	<p>SIK-p tusaatissatut tiguaa siunnersuummi § 14, maanna tapiissuteqartarnermik aaqqissuussinerup allanngortinneqarnera, højskolit maanna inatsisiliamik piareersaalluni suliami, aamma seminareqartitsinermi april 2016-imi maanna folkehøj-</p>	<p>Siunnersuummik allannguissamut tunnngavissiinnngilaq.</p>

		<p>skolit siunissami inissisimanissaat pillugu nammineq peqataanikuugami, aaqqissuussineq tunngaviusumik tapiissuteqartarnermik ilinniartunullu sapaatip akunnikkaartumik taxameteri atorlugu tapiissuteqartarnerup atorneqalersinnaaneranut.</p>	
2.4	SIK	<p>Aamma iluarisimaarnarpoq siunnersuummi ersimmat atuisut højskolernerminnut akiliuteqartarnerat atorunnaassasoq, ingerlatani taxa-meteri atorlugu aaqqissuussiviusuni. Tamannalu qularnanngitsumik højskolernissanut aqqutissiuusseqataassaaq.</p>	<p>Siunnersuummik allannguinnissamut tunngavissiiingilaq.</p>
2.5	SIK	<p>Siunnersuummut § 14, imm. 3-mi ersippoq folkehøjskole ilinniartukkaanut sapaatip akkunneri imm. 1 naapertorlugu ingerlassimanngikkunigit ingerlatsinermut tapiissutinik naapertuuttumik utertitsisussaasoq. Taamatut tapiissutinik utertitsisinnaanermut piumasaqaateqartoqarsin- naasariaqanngilaq. Aalajangersagaq aalajangi- simaniarneqarpat allanngor- tittariaqarpoq, taamalu uter- titsinissamik piumasaqa- taasinnaasut objektiviusu-</p>	<p>Siunnersuummik allannguinnissamut tunngavissiiingilaq.</p> <p>Tamanna isigineqassaaq tunuliaqutaralugu tapiissummi apeqqutaammata ingerlatat tapiissuteqarfigineqartut aamma naammassineqarnissaat. Tamanna suliniutit ingerlanneqartut tunngavigalugit tapiissuteqartarnermik aaqqissuussinermi aalajangiisuulluinnarpoq, tunngaviusussat objektiviusut aallaavigalugit ilinniartinnut tapiissuteqartarnermi.</p> <p>Tamatuma saniatigut</p>

		<p>mik tunngavilimmik pinna-ni naliliinermik tunngave-qartariaqarlutik. Højskole ilinniartunut sapaatip akunnerinik pilersaarutaasuniit ikinnerusunik</p> <p>ingerlatsisimappat tamanna imaassinnaavoq højskolimut tutsinneqarsinnaanngitsoq, taamaattunilu naapertuilluarnerussanngilaq ingerlatsinermut tapiissutit utertinneqarnissaat piumasarissallugu.</p>	<p>aningaasaliissutaasut pissutsinut naleqqussarneqarnissaanni pisariaqarfiisigut aningaasaliissuteqartarnermi ileqquusut nalinginnaasut atortinneqartussaapput, ingerlatsivinnut allanut aamma atuuttuusut. Pisortat taamaasillutik pisussaapput qularnaassallugu akileraarutisigut aningaasalersukkanik aningaasaliissutit aningaasaliiffiusunut aamma atorneqassasut.</p> <p>Tamannalumi aamma innuttaasunut kikkunnulluunniit aamma atuuttuovoq, pisortanit tapiiffigineqarnissamik siunertamut aalajangersimasumut qinnuteqarsimasunut.</p>
3.1.	Kommune Kujalleq	<p>Kommunip oqaatiginiarpaa isumaqataanini siunertaasunut anguniakkanullu inatsimmik allannguinnikkut siunnerfiusunut.</p>	<p>Siunnersuummik allannguinnissamut tunngavissiinnngilaq.</p>
3.2	Kommune Kujalleq	<p>Immikkoortoq nalinginnaasunik oqaaseqaatini uteqqittariaqarsorinarpoq siunnersuummut nr. 1-imut oqaaseqaatini. Pineqarpoq ”... Ilinniartitsinermik ingerlatsinerit pisortatigut piunasaqaatit naapertorlugit piginnaaneqalersitsisumik ilinniartitsinerunngitsut salliutinneqarumasut, folkehøjskolit</p>	<p>Siunnersuummik allannguinnissamut tunngavissiinnngilaq.</p> <p>Oqaasertat taakkua issuarneqartut inatsimmi tunngaviusut pingaarnerit aallaavigivai, folkehøjskolenik ingerlatsinermut atatillugu, allannguinnermili aalajangersagaq nr. 1-imi siunertaqarluni aallaaviup ersarissarnissaanik.</p>

		<p>ingerlatsinernik nalinginnaasumik peroriartuutaasumik inuttullu ineriartuusaasumik qitiutitsinerat naapertorlugu. Taamaalilluni højskolit qitiusumik ingerlataat højskolimi ilinniartut ataasiakkaat inuttut ilisimasatigullu ineriartornissaannut attuumassuteqartuupput. Aammattaaq qitiutinneqarpoq ilinniartut inuunermut, inuutissarsiutitaarnissamut ilinnialernissamullu piareernissaannik pilertsitsinissaq.”</p>	<p>Tamatumalu saniatigut nalinginnaasumik oqaaseqaatini oqaasertaq inatsisiliornermi periaatsit nalinginnaasut naapertorlugit aalajangersakkani ataasiakkaani uteqqitassaanani, immikkorluinnaq tamatumunnga pissutissaqartinnagu.</p>
3.3	Kommune Kujalleq	<p>Inatsisissatut siunnersuummut oqaaseqaatini immikkoortut naggataani aamma immikkut eqqaaneqartariaqarput sannaviit allat / nioqutissiornermik ingerlatsinerit allat ersersinniarlugu periarfissat siammasissuuneri: Sannavinni ingerlatsinerit assersuutigalugu ilaqarsinnaapput qamusiornermik, qaanniornermik, imaluunniit qilaasiornermik, amernik meqqunillu suliaqarnermik, kiisalu suliat nunalerinermut naatitsinermut, naatitanik qaqqameersunik imaaneersunillu iluaquteqarnermik,</p>	<p>Nalilerneqarpoq pissusissamisoorloq assersuutit arlallit eqqaaneqartarnissaat aalajangersakkap imartuujunera ersersinniarlugu.</p>

		piniarnermik, aalisarnermik imaatigut angalaarnermik, aalisarnermik silamilu inuuneramik aamma.	
3.4	Kommune Kujalleq	Kommunip siunnersuummi nr. 4 iluarisimaarpaa, § 1, imm. 5-imi nutaaq, taamalu folkehøjskolit neqeroorsinnaallutik ilinniartitsinernik ingerlatsinernik allanik, imm. 1-3-mi pineqartut saniatigut, ingerlatsisuusut isumaqatigiissuteqarfigine- risigut. Aalajangersakkap periarfissippaa assersuutigalugu kommuni, isumaginnittoqarfik imaluunniit Majoriaq imaluunniit arlallit ataatsimoorlutik ingerlatsinissanik pisisinnaasut højskolimut ersarinnerusumik isumaqatigiissuteqarnikkut.	Siunnersuummik allannguissamut tunngavissiiingilaq.
3.5	Kommune Kujalleq	Siunnersuummi immikkoortut tallimaanni § 14-imut atorneqarpoq taxameteri taaguutitut, ilaatigut § 14, imm. 2 aamma 3-mi, aamma ilinniartunut tapiissutit”. Naatsorsuutigaarput siunnerfiusoq taaguutit taakkua marluk imarisamikkut assigiittut, taamaattumillu siunnersuut naleqqussarneqassasoq, taaguutit assigiit atorniarlugit.	Siunnersuummik allannguissamut tunngavissiiingilaq. Ilinniartumut tapiissutit, § 14, imm. 4 aamma 5-imi eqqaaneqartut ingerlatsinermut tapiissutitullu, takuuk imm. 1 aammalu taxameteri atorlugu tapiissutitut, takuuk imm. 2. Aalajangersakkami imm. 4 isumaqarpoq ilinniartumut tapiissuteqartoqarpat ingerlatsinermut tapiissutitut imaluunniit taxameteri atorlugu tapiissutitut, taava nammineq akiliutissamik

			akiliisitsisoqarsinnaanngitsoq.
3.6	Kommune Kujalleq	Apeqquserneqarpoq ingerlatsinermut tapiissutini ilanngaasarneq, pisuni ilinniartunut sapaatip akunneri holdillu naammassisassat naammassineqannginnerini. Imatut paasineqarpoq ilinniartukkaat holdit arlallit ilinniartitsinertut ”ilinniartumik sap. akunnerani. Ingerlatsinermi taamaatsittoqarpat (taamaatsittoqartarneralu pinngitsoorneqarsinnaanngi- laq) taava ataatsimut højskolimut tapiissutissanik ilanngaasoqartarpoq, taxameterikkut akiliutini, aamma ilinniartut qassiunerannik sap. ak. qassiunerinik tunnngaveqartartunik. Ilinniartut ikinneruppata soorunami ingerlatsinermut aningsaasartuutit ikinnerussapput, kisiannili tigussaasumik ilanngaanissamut inissaqanngilaq. Inatsimmi oqaasertaliineq siunnersuutaasoq isumaqarpoq ilanngaasoqassasoq tapiissutini arlariinni, ingerlatsinermut aamma taxameterimi.	Siunnersuummik allannguissamut tunnngavissinngilaq. Innersuunneqassaaq 2.5-imi oqaaseqaat. .
3.7	Kommune Kujalleq	Inatsisissatut siunnersuutip aningsaasatigut allaffissor- nikkullu kingunerisassai pillugu oqaaseqaatini ersip-	Siunnersuummik allannguini- samut tunnngavissinngilaq. Missingersuut suliaavoq kom-

		<p>poq kommuninut ataatsimoortumik tapiissutit ilanngaavigineqarneri, kommuninut atuisut akiliutissaannut tapiissuteqartarnermut pisussaaffiata atorunnaarneratigut annertussusilerneqartoq 1.200.000 kr.-inut. Kisitsisip taassuma suut imarai? Tassaava annertussuseq 2017-imi ataatsimoortumik kommuninut tapiissutini? Imaluunniit 2017-imut tigussaasumik ataatsimoortumik tapiissutini allamik kisitsiseqarpa? 2017-imi ataatsimoortumik kommuninut tapiissutini kisitsit allaappat, kisitsit taanna siunnersuummut oqaaseqaatini ersittariaqarpoq.</p>	<p>munit akiliuteqartussatut pisussaaffit inatsisit atuuttut naapertorlugit aallaavigalugu, højskole 110-nik ilinniartoqarsimagaluarpat. Maanna pisortat tapiissutaat 365 kr. -it sapaatip akunneranut, taakkunanga kommunit 75 %-i = 274 kr.-it.</p> <p>Kisitsit pinngorpoq naatsorsuutigalugu ilinniartut 110 sapaatip akunnerini 40-ni, aningaasartuutillu kommuninut tuttussat malit-tarisassat atuuttut naapertorlugit.</p>
3.8	Kommune Kujalleq	<p>Inatsisissatut siunnersuutit aningaasatigut allaffissor-nikkullu kingunerisassai pillugit oqaaseqaatini ersippoq aningaasanik nuussineq maanna inuusuttuaqqanut siunnerfiusunut suliniutiniit 3.070.000 kr.-inik aningaasartalligaasoq. Taamatut missiliuussineq ersernerluppallaqaaq nalilersussallugu kingunerisassai annertussusialu. Suut imaritinneqarpat ”inuusuttuaqqanut immikkut siunnerfiusunut”, kikkut (qassinik ukiullit assersuutigalugu, 18-it sinnerlugit imaluunniit inorlugit. Ilinniagaqanngitsut il.il.) suliniutillu suut pineqarpat? Ersarinnerusumik</p>	<p>Siunnersuummik allannguinsamut tunngavissiiingilaq.</p> <p>Naalakkersuisut naatsorsuutigaat Aningaasanut inatsisissamut 2018-imut siunnersuummi aningaasaliissutissanik nassaarnis-saq kontumi pingaarnermi 20.11.70 suliniutinut nutaanut sillimmatit ilanngarnerisigut, 2017-imi 5 mio. kr.-inik immikkoortitsisoqarmat inuusuttuaqqanut siunnerfiusunut ikaarsaariarnermi suliniutinut atorneqartussanik.</p>

		<p>oqaaseqaatini nalunaarneqartariaqarput, inuusuttuaqqanut siunnerfiusunut kikkunnut suliniutit sammititaanersut. Kiisalu aamma tigussaanagerusumik nalunaarneqartariaqarpoq ilanngaaniarnerit isumaliutaasut kinguneqassanersut maanna tapiissutaasartunut ingerlatanullu, ullumikkut Majoriami kommunini ingerlanneqartartunut.</p>	
4.1	<p>Knud Rasmussenip Højskolia</p>	<p>Qujassutigineqarpoq pissarsiviulluartumik april 2016-imi seminareqarsimaneq.</p>	<p>Siunnersuummik allannguissamut tunngavissiiingilaq.</p>
4.2	<p>Knud Rasmussenip Højskolia</p>	<p>Pingaaruteqarpoq erseqqissassallugu Knud Rasmussenip Højskolia (KRH) ingerlatsiviummat imminut pigisoq, namminerlu siulersuisulik, pingaaruteqarporlu Namminersorlutik Oqartussat siunissamut sammitillugu KRH-p inissisimaneranik ataqqinninnissaat.</p>	<p>Siunnersuummik allannguissamut tunngavissiiingilaq.</p> <p>Tamatumunnga oqaatigineqassaaq inatsimmi maanna atuuttuusumi § 8, imm. 1, oqaaseqatigiinni siullerni ersimmat ilinniarfik ingerlatsiviusoq imminut pigisoq, aqunneqarneralu siulersuisunit isumagineqartoq, pingaarnertut ilinniarfiup ingerlanneqarneranut akisussaasuusumik, tamatumani aamma fagigut aningaasaqarnikkullu ingerlatsinermut, ilinniarfimmullu aalajangersakkat naapertorlugit ingerlatsisoqarnissaanut. Siunnersuut siunertaqanngilaq</p>

			siunertamik tamatuminnga allannguissamik.
4.3	Knud Rasmussenip Højskolia	Kiisalu aamma pingaaruteqarpoq aalajangiutissallugu KRH ingerlatsiviummat annertunngitsoq, killeqartunillu aningaasatigut allaffissornikkullu periarfissalik. Taamaattumik pingaaruteqarpoq inatsisiliorneq killiliussatut inatsisaassasoq, ersarisoq, piuminartoq allaffissornikkullu piuminartoq, sapinngisamillu annikinnerpaamik Aqutsisoqarfimmiit imaluunniit Naalakkersuisoqarfimmit akuleruffigineqartartoq ulluinnarni ingerlatsineq eqqarsaatigalugu.	Siunnersuummik allannguissamut tunngavissiinngilaq. Innersuussisoqassaarlutik aamma siuliani 4.2-mut oqaaseqaammut.
4.4	Knud Rasmussenip Højskolia	Siunnersuut naapertorlugu tunngaviusumik tapiissutitalimmik ingerlatsiniartoqarpoq. KRH-p paasivai ileqqussat tunngaviusussat aamma ilinniartukkaartumik sapaatip akunneranut taxameteri atorlugu tapiissuteqartarnissat, kisianni soorlu siunnersuummut oqaaseqaatini ersittoq tunngaviusumik tapiissutit taxamaterilu naapertorlugu tapiissutissat aningaasanut inatsimmi	Siunnersuummik allannguissamut tunngavissiinngilaq. Ilumoorpoq tapiissutit aningaasanut inatsimmi Inatsisartunit aalajangerneqartassammata. Soorluli ingerlatsivinnut allanut aningaasaliissutit, tamatumani aamma Namminersorlutik Oqartussat nammineq ilinniarfiutaanut il.il. tamarmik Inatsisartunit aningaasaliisartuusunit aalajangerneqartartut, aningaasaliissutissallu annertussusissaat aalajangerneqartarlutik.

		aalajangersarneqartassapput. Tamatuma kingunerissavaa aningaasatigut kingunerisassai siunnersuutip tapiissutissat aningaasanut inatsimmi aalajangersarneqartarnissaan nik tunngaveqassasut.	
4.5	Knud Rasmussenip Højskolia	Tapiissutit ukiuni amerlasuuni akinut malinnaatinneqarsimangillat. Assersuut: 1988-imi ukiumoortumik KRH-mut tapiissutit 5.449.053. kr.-iupput, 2016-imi, tassa ukiut 28-it qaangiunneranni ukiumut tapiissutit 6.080.000. kr.-iupput, 4 mio. kr.-it 1988-imi assigaat 9,4 mio. kr.-it 2016-imi, aningaasat naleerukkiartornerat ilanngullugu naatsorsoraanni. Maanna siunnersuutaasumut oqaaseqaatini tapiissutit tunngaviusut højskolinut marlunnut tamarmik immikkut 4 mio. kr.-iussasut, aamma ilinniartunut sap. ak. Taxameterimut 2.500 kr.-it. Ilanngullugulu tunngavigineqarpoq højskolit ingerlatsinermut tapiissutit utertittassagaat højskolip sap. ak. ilinniartoqarfissat inatsimmi aalajangerneqartut naammassisimangippagit.	Siunnersuummik allannguiniissamut tunngavissiiingilaq. Aningaasanik utertitsisarsinnaanermik apeqqut tassaaginnarpoq aningaasaliissuteqartarnermi ileqqut nalinginnaasut ilaat, ingerlatsivinnut allanut aamma atortuusooq, tunngaveqarlunilu pisortat pisussaaffigimmasuk qularnaassallugu akileraartartut aningaasalersugaannik aningaasaliissutit siunertaminnut atorneqartussaaneri, tak. aamma siuliani 2.5-imi oqaaseqaatit.
4.6	Knud Rasmussenip	KRH-ip ilinniartui ukiuni kingullerni tassaasarput	Siunnersuummik allannguiniissamut

	Højskolia	<p>tarnikkut innarluutillit, atuarsinnaanngitsut, inuusuttuaqqat allat, sanngiitsut aamma ingerlalluartut. Højskolit katersortarpaat inuusuttut inooqatigiinnermi sanngiinnerusut, pinerlunnermut, atonerluinermut imminnullu pilersorsinnaanermikkut ungasinnerusut, inuusuttullu pineqartut taakkua tunngaviusunik piginnaanernik imminullu tatiginermik ineriartortitsinissaannut aqutissiuuttarlugit. Taakkua tunngavissaqalersarput inuunerminnik allannguisartutut innuttaaqataasutullu ingerlalluartut. Avatangiisiminni ilisarnaatitut malinniagassatullu isigisaalersarput, - minnerunngitsumik nunaqarfinni minnermi illoqarfinnilu, ilaqtutanut, ikinngutinut inuusuttunullu allanut taamatut aamma inissimasuusunut. Soorluttaaq højskole ilinniartunik ukioqqortunerusunik aamma tiguisartoq, inuunerminni unittoorsimasunik, taakkualu aamma inuunerminni</p>	<p>tunngavissiiingilaq.</p> <p>Taamaattoq tamatumunnga oqaatigineqassaaq siunnersuutip siunertaasa pingaarnertit ilagerpiarmassuk kajumissaarineq, periarfissiisussaaq amerlanertit højskolini tiguneqartalernissaannut taamalu iluaquteqarnerup annertunerulernissaa.</p>
--	-----------	---	--

		<p>ingerlaqqinnissaminnut sakkussaqaalersarput. Højskolillu siunissami aamma inuit assigiinngitsut inuusuttut ukioqqortunerusullu tigusarusuppai, inuit atuarsinnaanngitsut aamma innarluutillit, ajoraluartumik inuiaqatigiinni ilinniartitaanernilumi qimataasimasut.</p>	
4.7	<p>Knud Rasmussenip Højskolia</p>	<p>KRH-mut assut qinnuteqartoqartarpoq. Assersuutigalugu ukiup siuliani 500-t missaannik ingerlatamut ataatsimut qinnuteqartoqarpugut. Taakkunannga 50-it sinnillit ordblindiupput. Nalinginnaasuvoq qinnuteqartut 200-300-t qinnuteqartitsinerit tamaasa. Kisitsisit takutippaat pisariaqartitsineq annertuujusoq. KRH-llu ingerlatsilluarnera aamma taamaatiinnartartut ikittunnguunerisa ersersippaat.</p>	<p>Siunnersuummik allannguinnissamut tunngavissiinnngilaq.</p>
4.8	<p>Knud Rasmussenip Højskolia</p>	<p>Piffissami 1987-1993 KRH-mi sulisuupput forstanderi, ilinniartitsisut aalajangersimasut 5-6 kiisalu timelærerit arlallit, ilinniartunik 50-60-it missaannik aallussisut. Ullumikkut ilinniartitsisut aalajangersimasut marluk akissaqartinneqarput timelærerillu marlussuit. Ilinniartullu amerlanertigut</p>	<p>Siunnersuummik allannguinnissamut tunngavissiinnngilaq.</p>

		<p>nukinnik atuiffigisariaqarnerusuusar- put, siusinnerusumut sanilliullugu, amerlasuullu annerusumik ikiorserneqartarnissamik pisariaqartitsisuusarlutik ulluinnarni. Højskolep nuannaarutigisimavaa ilassutitut aningsaliivigineqarsima- neq siunnersortimut – coach-imut Namminersorlutik Oqartussanit aningsaliivigineqarsima- neq ukiut siuliini, ajoraluartumilli taanna 2017-imi sipaarutigineqarpoq. Højskolimi coach assut atorfissaqartinneqarpoq.</p>	
4.9	<p>Knud Rasmussenip Højskolia</p>	<p>Isumaqatiginngilarput tapiissutinik utertitsisarnissaq § 14, imm. 3-mi siunnersuutigineqartutut.</p>	<p>Siunnersuummik allannguinissamut tunngavissiinngilaq.</p> <p>Aningsaliissutit ilaasa naatsorsuereernikkut utertinneqarsinnaanerat aningsaliissuteqartarnermi periaatsinik nalinginnaasunik tunngaveqarpoq, aamma ingerlatsivinnut allanut sammisumik atortuusumik. Tamannalu pissuteqarpoq pisortat pisussaammata qularnaassallugu akileraartartut akiligaannik aningsaliissutit aningsaliiviusunut atorneqartussaanerannik, takukkit aamma oqaaseqaatit nr. 2.5-imut. Aningsaliissutillu</p>

			<p>anigaasaliiviusunut atorneqarsimangippata tamatum kingumoortumik naatsorsuinissaq pisussaalersissavaa.</p>
4.10	<p>Knud Rasmussenip Højskolia</p>	<p>Siunnersuutigaarput tunngaviumik tapiissutit siunissami 6 mio. kr.- iussasut, aammalu ilinniartukkaanut taxameterimit akiliut 2.500 kr.-iussasoq.</p>	<p>Siunnersuummik allannguissamat tunngavissiinnigilaq.</p> <p>Aningaasaliissuteqartarnek ataatsimut Inatsisartut susassaqarfianniippoq, anigaasanut inatsimmut tunngatillugu. Ilutigisaanilli oqaatigineqassaaq siunnersuummi anguniakkat pingaernerit ilagimmassuk anigaasaleeriaatsip qimmassaataasup atortuulersikkiartuaarnissaa, tamatumani tunngaviulluni tunngaviumik tapiissutit aamma taxameteri atorlugu anigaasaliisarnek.</p>
4.11	<p>Knud Rasmussenip Højskolia</p>	<p>KRH assut ingerlatsivinnik allanik suleqateqarumavoq, kisiannili tamatum pinngitsaaliissutaanissaa aalajangersakkani arlalinni allassimasutut isumaqatiginagu.</p>	<p>Siunnersuummik allannguissamat tunngavissiinnigilaq.</p> <p>Ilumoorpoq KRH-p periarfissai neqeroortigisassallugit ilinniartitsinerit nalinginnaasumik allanit ingerlanneqartartut, pisariaqartimmagu ingerlatsivinnik / ilinniartinnik suleqateqartarnissaaq ilinniakkanik pineqartunik suliaqartartuusunik. KRH assersuutigalugu § 1, imm. 3. oqaaseqatigiit siulliit naapertorlugit ilinniartitsinernik neqeroorteqassaguni</p>

		<p>inuussutissarsiutinut ilinniaritaanerni imaluunniit GU-mi ingerlanneqartartunik, taava tamanna § 1, imm. 4 naapertorlugu ingerlanneqartassaaq suleqatigiinnissamut isumaqatigiissut inuussutissarsiutinut ilinniarfimmuut imaluunniit GU- mut illuinnarni ilinniakkanik pineqartunik ingerlatsisuusartumut. Tamannalu maanna ersarinnerusunngortinniarlugu erseqqissaasoqarpoq oqaaseqaatini ilassusiinikkut inatsisissatut siunnersuummut nr. 4-mut, ingerlatsisut allat nalinginnaasumik tassaasartut assersuutigalugu ingerlatsiviit imaluunniit pisortat il.il., nalinginnaasumik ilinniaritaanermut pineqartumut akisussaasuusut.</p> <p>Tassanilu pineqarpoq aalajangersagaq Inatsisartut aalajangersagaat UKA 2010-mi, pitsaassuseq aalajangersimasoq qularnaarniarlugu, suleqatigiinnissamut isumaqatigiissummi allaaserineqarsinnaammata uppernarsarneqarsinnaallutillu fagitigut qaffasissusissaq ilinniarfimmuut pineqartumut suleqatigineqartussamut. Atuartitsineq højskolimi ingerlanneqarmat piomasaaqatit atuartitsinissamut tunngasutigut taamaaginnassapput. Allatut</p>
--	--	--

			<p>oqaatigalugu ilinniartitsineq minnerpaamik assigisaanik pitsaassuseqassaaq inuussutissarsiornermut ilinniarfimmi imaluunniit GU-mitulli, tamatumali killilissanngilaa højskolimi ilinniartitsinerup ilusilersorneqarnissaa.</p>
4.12	<p>Knud Rasmussenip Højskolia</p>	<p>Suleqatigiinnissamik piunasaqaat aamma assersuutigalugu eqqaaneqarpoq PKU-mi pikkorissarnernut atatillugu, tassani nalunaarneqarmat Majoriaq suleqatigineqartussaasoq.</p>	<p>Tamatumunnga pissutaavoq PKU-mi pikkorissarnerit ullumikkut Majoriamit neqeroorutigineqartarnerat. Kiisalu innersuussisoqarpoq siuliani 4.11-imi oqaaseqaatinut.</p> <p>Oqaaseqaataasup kingunerisaanik ilassutigineqarpoq ”assersuutigalugu”, ersersinniarlugu ingerlatsisunik allanik peqarsinnaasoq, pikkorissarneq pineqartoq allanit ingerlanneqarpat.</p>
4.13	<p>Knud Rasmussenip Højskolia</p>	<p>Siunnerfiuvoq stipendiat aalajangersimasut højskolini ilinniartunut, ilanngaatigalugit nerisaqarneq ineqarnerlu, ilinniartunut højskolimi najugaqartussanut, kisianni qanormi højskolimi najugaqanngitsunut.</p>	<p>Siunnersuummik allannguinissamut tunngavissiinnngilaq.</p> <p>Naatsorsuutaavoq ilinniartut tamarmik højskolernerup ilaatut højskolimi nerisaqarnissamik ineqarnissamillu neqeroorfigineqartassasut. Ilinniartuq kiffartuussinermik taassuminnga tigusiniangippat stipendiat qaffanneqassanngillat ilinniartup qinersineranik tunngavilimmik.</p> <p>Højskole ilinniartussaminik illoqarfimmi angerlarsimaffigisamineersunik</p>

			<p>tiguserusussappat, nerisaqarnissamik ineqarnissamillu neqerooruteqarani, ilinniartuusinnaasup nammineq nalilertariaqarpaa stipendiat imatut annertussuseqarnersut højskolerusussalluni.</p>
5.1	IMAK	<p>IMAK inatsisissatut siunnersuummik tikilluaqquvoq.</p>	<p>Siunnersuummik allannguinnissamut tunngavissiiingilaq.</p>
6.1.	<p>Inuussutissarsiornermut, Suliffeqarnermut, Niuerner- mut Nukissi- uuteqarnermu- llu Naalakker- suisoqarfik</p>	<p>Ajuusaarnarpoq inatsisissatut siunnersuummut oqaaseqaatini qupperneq 3- mi allanneqarmat højskolit PKU-mi pikkorissarnernik neqeroorsinnaasut. PKU-mi pikkorissarnerit inuussutissarsiuutinut ilinniarfinnut isumaqatigiissuteqarnikkut ingerlanneqartarput, PKU kursusit inuussutissarsiuutinut ilinniartitaanerni pikkorissarnerummata, inuussutissarsiornermut toqqaannartumik piumaneqartuusut, inuussutissarsiornermullu ilinniarfiit fagitigut pitsaassusissaannut qularnaarisuusarlutik. Højskolit fagitigut piginnaanerit piginnigilaat inuussutissarsiuutinut ilinniartitaanernut tunngasusut, taamaattumillu højskolit</p>	<p>Oqaaseqaatit paatsoornermik tunngaveqartutut isikkoqarunarput, højskolit PKU-mi pikkorissarnernik ingerlatsisinnaanerat inatsimmi atuuttumit issugaammat.</p> <p>Namminersorlutik Oqartussat malittarisassiortarnernut ileqqoreqqusaat naapertorlugit oqaaseqaatini siunnersuutip nutaartaanik samminninginnermi malittarisassat atuuttuusut sammeneqaqqaartussaapput.</p> <p>Nalunaarsukkat taamaasilluni taamaallaat uteqqiinerupput Inatsisartut UKA 2010-mi aalajangersagaannik, Folkehøjskolit pillugit Inatsisartut inatsisaannik nr. 24, 18. november 2010-meersumik. Inatsisartut tamatumunnga atatillugu oqaaseqaatinik imaattunik aalajangersaasimapput, inatsimmi § 1, nr. 3-mut tunngatillugu: ”</p>

		<p>PKU-mi pikkorissarnernut neqeroortuusinnaanatik. Inuussutissarsiutinut ilinniarfiup qinersinnaavaa pikkorissarnissaq højskole suleqatigalugu ingerlanniarlugu, taamalu piunasaqaataassaaq ilinniarfitsineq inuussutissarsiutinut ilinniarfimmiit neqeroorutaassasoq, inuussutissarsiutinullu ilinniarfik akisussaasuulluni PKU-mi pikkorissarnernut kiisalu pikkorissarnerni uppernarsaatip atsiornissaanut.</p>	<p>Aalajangersakkap aammattaag inatsisitigut tunngavississinnaavaa ilinniarfitsinerit sivikinnerusut neqeroortugineqarsinnaanerat, soorlu ilinniarsimanngitsunik piginnaanngorsaalluni pikkorissaanerit (PKU) imaluunniit inuutissarsiutinik ilinniarfitsinermi pikkorissaanerit akuerisaasut (AEU), taamalu pisoqassappat Piareersarfiit suleqatigineqarsinnaapput, tak. aalajangersakkami imm. 4.”</p> <p>Aalajangersagarli isumaqanngilaq folkehøjskolit nammineerlutik PKU-mi pikkorissaanernik aaqqissuussisinnaasut, kingornagullu akiligassiillutik. Aalajangersagaq paasineqassaaq Naalakkersuisoqarfik akisussaasoq isumaqaruni højskole naleqquttunik piginnaanernik pigisaqartoq, PKU-mik ingerlatsinissanut siunnerfiusunut sammivilinnik, inuussutissarsiutinut ilinniarfiit nammassisinnaanngisaannik, højskolimut pineqartumut isumaqatigiissuteqartoqarsinnaasoq PKU-mi pikkorissarnernik ingerlatsinissanik. Kiisalu siuliani eqqaaneqartutut 4. 12-imi ilaavoq ”assersuutigalugu”, erseqqissarniarlugu isumaqatigiissuteqartoqassasoq pikkorissaanernik nalinginnaasumik ingerlatsisuusartunut.</p>
--	--	---	---

			<p>Kiisalu maanna oqaaseqaatini ilanngunneqarpoq siunnersuummi nr. 4-mut § 1, imm. 5-ip nutaap oqaasertalernissaanut atatillugu ingerlatsisut nutaat, højskolit isumaqatigiissuteqarfigisassaataassaagajuttut assersuutigalugu ingerlatsiviit pisorta qarfiilluunniit il.il. nalinginnaasumik ilinniartitsinernut pineqartunut akisussaasuusartut, takuuk aamma siuliani 4.11.</p>
6.2	Inuussutissarsiornermut, Suliffeqarnermut, Niuerner- mut Nukissi- uuteqarnermu- llu Naalakker- suisoqarfik	AEU-mi pikkorissarnerit (Inuussutissarsiutinut ilinniartitaanerni pikkorissarnerit akuerisat) Majoriami ingerlanneqartartut 2017-ip naanerani unissasut, taamalu inatsisissatut siunnersuummi eqqartussallugit pisariaarullutik.	<p>Siunnersuummik allannguinsamut tunngavissiiingilaq.</p> <p>Ilumoorpoq AEU unissammat 1. august 2017. Oqaaseqaatini ilanngunneqarpoq ersersinniarlugu suliniutit suut aalajangersakkami tassani pineqarnerisut, AEU piffissami tusarniaaviusumi siunnersuutilli Inatsisartuni suliarineqarfissaatut naatsorsuutaasumi suli neqeroorutaassammat atuuttoq, atorneqarsinnaasoq assersuutitut aalajangersakkap atuuffissaanut. Siunissami neqeroorutiniq allanik AEU-mut assingusunik takkuttoqaqqissanersoq taamaallaat eqqoriarneqarsinnaavoq, naak naatsorsuutaagaluartoq pissusissamisuusasoq FA-mi ingerlatsineq kisiat neqeroorutigineqassasoq.</p>
6.3	Inuussutissarsiornermut, Suliffeqarnermut, Niuerner- mut Nukissi-	Qupperneq 10-mi ”Aningaasaqarnikkut allaffissornikkullu kingunerisassai” pillugit oqaaseqaammi 3.070.000 kr. -it nuunneqartussaapput	<p>Siunnersuummik allannguinsamut tunngavissiiingilaq.</p> <p>Innersuunneqassaaq 3.8 Naalakkersuisut 2018-imut</p>

	uuteqarnermu-llu Naalakkersuisoqarfik	maanna inuusuttuaqqanut siunnerfiusunut sullitassatut aningaasaliissutiniit. Inuusutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfiup tikkuassavaa aningaasartuutissat tamarmik Naalakkersuisoqarfimmut aningaasaliissutiniit aaneqartussaammata, aammalu inuusuttuaqqanut immikkut sullitassatut siunnerfiusunut aningaasaliissutit sinneqanngimmata.	Aningaasanut inatsisissamut siunnersuutaanni qanoq aningaasalersuisoqarniarnersoq pillugu.
6.4	Inuusutissarsiornermut, Suliffeqarnermut, Niuernermut Nukissiuuteqarnermu-llu Naalakkersuisoqarfik	Siuliani oqaaseqaataasut tunngavigalugit qinnutigineqassaaq tusarniaanermi allakkiaq utertinneqassasoq, isumaqaratta pissutsinut atuuttunut taamak naapertuutinningsigisoq, suliassaqarfimmi inatsisinut atuuttunut sanilliullugu.	Siunnersuummik allannguinnessamut tunngavissiinnngilaq. Soorluli 6.1-6.3-mut oqaaseqaatini takutinneqareersoq, ataatsimut isigaluni inatsisinik atuuttunik issuaaneruvoq.
7.1	KANUKOKA	Højskolit sivisuumik ersersittuartarpaat piunmassuseqarlutik inuiaqatigiinni politikikkut kissaataasunut, innuttaasunik ilinniartitaanikkut qaffasinnerulersitsiniarnermi peqataajumallutik, inatsisissatut siunnersuut tamatumunnga atatillugu tikkuussineruvoq siunissami qanoq højskolit suliassami tassani inissisimasinnaanerannik.	Siunnersuummik allannguinnessamut tunngavissiinnngilaq.
7.2	KANUKOKA	Inatsisissatut siunnersuut	Siunnersuummik

		<p> aqqutissiuussissaaq periarfissanik højskolit nalinginnaasumik ingerlattakkaminnut ilassutitut aaqqissuussisinaanersut akuerisaasumik ilinniartitsinermik ingerlatsisarnikkut, siunnerfigalugu inuunermut, inuussutissarsiornermut, ilinniarnissamullu piareersimanissamut aaqqutissiuussisoqassaner- soq, inuussutissarsiutinut ilinniartitaanerni isernissamut piumasaqaatinik naammassinninnissamut naapertuuttunik. </p>	<p> allannguinnissamut tunnngavissiiingilaq. </p>
7.3	KANUKOKA	<p> Inatsisiliornermi taaguutit annertussutsillu ”tamanut ilisimasariaqartunik ilinniagaqarsimaneq” isumaliutigisariaqarpoq taaguutit taamaattut imarisaat inatsimmi inatsimmulluunniit oqaaseqaatini suunerisa allaaserisarnissaat, qanoq isumaqartinneqarnersut, assersuutigalugu IT-mik paasisimasaqarneq tamanit ilisimasariaqartunut ilaasoq. </p>	<p> Siunnersuummik allannguinnissamut tunnngavissiiingilaq. </p> <p> Eqqaasitsissutigineqassaaq pineqarmat inatsimmut atuuttumut naalagaasumut allannguutissatut siunnersuutit. Taaguutit eqqaaneqartut taamaasillutik inatsimmi naalagaasumi allaaserineqareerput. Assersuutigalugu manna inatsimmut naalakkamut oqaaseqaatini § 1-imut tunnngatillugu allassimavoq, taaguut ”tamanut ilisimasariaqartunik ilinniagaqarsimaneq” pillugu: ”tamanut ilisimasariaqartunik ilinniagaqarsimaneq” paasineqassaaq tamatumunnga </p>

		<p> atatillugu højskolit peqataassasut qularnaarumallugu innuttaasut ilisimasamikkut ineriartornissaat, kívitsisoqarnissaa, aammalu imaappoq tamanut ilisimasariaqartunik ilisimasaqarneq illuatungiusoq piginnaasassanik immikkut sammivilimmik ilinniagaqarnermut. Tamanut ilisimasariaqartunik oqarneq ilutigisaanik perorsaanermut atuartitsinermullu qilertariaqarpoq, soorluttaaq perorsaanermut atatillugu atorneqaruni pissuserinnertut paasineqartartoq, silassorissutsimi, misigissutsimut, pissusilersornermut aamma timikkut inuup kinaassusia tamarniusoq ineriartortinneqartarmat. Ilanngullugulu eqqaaneqarsinnaavoq ilinniartut tamanut ilisimasariaqartunik ilinniagaqarsimanissamut atatillugu amerlasuutigut aalajangersimasunik anguniagaqartanngitsut, imaluunniit assigiissunik anguniagaqartanngitsut atuarnermi peqataanerminnut atatillugu, soorluttaaq aallutat sammiumasallu siunnerfimmut aalajangersimasumut aalajangiussisimasanngitsut.” </p> <p> Tamatumunngalu atatillugu aamma eqqaaneqassaaq </p>
--	--	---

			atuartitsisarneq assersuutigalugu IT-mut tunngasuni taaguummi aamma pineqarsinnaammat.
7.4	KANUKOKA	<p>§ 1, imm. 4-p aalajangiuppaa” ilinniartitsinermik ingerlatsinerit imm. 1-3-mi taaneqartunit allaanerusut neqeroorutigineqarsinnaasut ingerlatsisut allat tamanna pillugu isumaqatigiissuteqarfige-reernerisigut.” nalinginnaasumillu inatsisissatut siunnersuummut oqaaseqaatini ersippoq tassani immikkut eqqarsaatigineqartut PKU-mi pikkorissartarnerit imaluunniit AEU-mi pikkorissartarnerit, taamaattoqarpallu taakkua Majoriaq suleqatigalugu ingerlanneqartassasut. Nalunaarneqarpoq ”ingerlatsisut allat” inatsisip oqaasertaani allanngortinneqartoq, ersarinnerusumik ersersinniarlugu ilinniartitsinernik allanik neqerooruteqarnerit suleqateqarluni imaluunniit ingerlatsivinnut allanut isumaqatigiissuteqarnikkut, taakkualu ilinniartitsineq tamaat akisussaaffigisassagaat.</p>	<p>Maanna ilanngunneqarpoq oqaaseqaatini inatsisissatut siunnersuummi nr. 4-p oqaasertalersornerani, § 1 imm. 5-imi nutsaami, ingerlatsisut allat, assersuutigalugu ingerlatsiviit imaluunniit pisortat il.il. nalinginnaasumik ilinniartitsinernut pineqartunut akisussaasuusartut, tak. aamma oqaaseqaatit 6.1 aamma 4.11-imut.</p>

7.5	KANUKOKA	<p>§ 1, nr. 5 -imi eqqunneqarpoq ”taxameteri” atorlugu tapiissuteqartarneq, inatsisip oqaasertaani nassuiaatitulluunniit oqaaseqatini ersarinnerusumik nassuiarneqanngitsoq.</p> <p>Isiginiaraanni aallaavittut ingerlatsinermut tapiissutit utertikkumaneqarsinnaasut atorneqartut, ilinniartitsineq naatsorsuutigisatut ingerlanneqarsimanngippat, aamma taxa-meteri atorlugu tapiissuteqartarneq, uterteqquneqarsinnaanngitsoq, naatsorsuutigineqarpoq tunngaviusumik tapiissutit tunniunneqartartut atuartitsineq imaluunniit iliuusissanut pilersaarutit tunngavigalugit, taxameterilu tunngavigalugu tapiissutit tapiissutaasut ingerlatsineq tunuliaqutaralugu.</p> <p>Tapiissuteqartarnermik aaqqissuussinerni assigiinngissut taanna ersarinnerusumik allaaserineqartariaqarpoq inatsimmi imaluunniit inatsisissamut oqaaseqatini.</p>	<p>Oqaaseqaat ilanngunneqarpoq, taamaasillunilu nalinginnaasumik oqaaseqaatini immikkoortumik ikkussisoqartarluni taxameteri atorlugu tapiissuteqartarnerup nassuiarneqarnera.</p>
7.6	KANUKOKA	<p>Inatsisip oqaasertaani § 14, imm. 3-mi ersippoq Naalakkersuisut ”ilitsersuusiorsinnaapput”.</p> <p>Taaguut taanna naammattumik</p>	<p>Siunnersuummi ilanngunneqarpoq.</p>

		ersarissuseqartutut inngilaq. Oqaatsinik atuinermi pissusissamisoornerussaaq oqassalluni Naalakkersuisut ”ersarinnerusunik malittarisassiorsinnaapput”.	
7.7	KANUKOKA	§ 14, imm. 5 isumaliutigisariaqarpoq allatut oqaasertalersornissaa, paatsoortoqarsinnaammat, ilinniartut eqqaaneqarmata ilinniartunut tapiissutinik pissarsisinnaasut, imm. 4-mili ersilluni ilinniarfiit ilinniartunut tapiissutinik pissarsisartut, ilinniartullu pisinnaatitaaffii § 20-mi allaaserineqarlutik.	Siunnersuummik allannguinnissamut tunngavissiinngilaq. Soorlu siuliani 3.5-imut oqaaseqaatini nalunaarneqartutut, ilinniartumut tapiissutit, § 14-imi imm. 4 aamma 5-imi eqqaaneqartut ingerlatsinermut tapiissutit, tak. imm. 1 aamma taxameteri atorlugu tapiissutit, tak. imm. 2 akilerneqarsinnaapput. Aalajangersakkap imm. 4-a isumaqarpoq taamaasilluni ilinniartumut tapiissutinik akiliisoqarpat ilinniartumut, ingerlatsinermi tapiissutit imaluunniit taxameteri atorlugu tapiissutit taava ilinniartoq nammineq akiliuteqartinneqassanngilaq.
7.8	KANUKOKA	KANUKOKA-p maluginiarpa kommuniniit aningaasaleeqataasarneq højskoliniinnernut atorneqarunnaartoq, ilinniartut akiliutaat atorunnaarmat.	Siunnersuummik allannguinnissamut tunngavissiinngilaq.
8.1	Kommuneqar-fik Sermersooq	Inatsimmik allanngueq kalaallit højskoliini ilinniartunik tigusiumassutsimik annertusaassaaq, inuusuttuaqqanilu siunnerfiusut ilaannut	Siunnersuummik allannguinnissamut tunngavissiinngilaq.

		iluaqusiissalluni.	
8.2	Kommuneqarfik Sermersooq	Kommuneqarfik Sermersoorli ernumavoq højskolini aningaasartuutaanerulersusat inatsimmik allannguinnikkut matussuserneqarnissaanni siunnersuutigineqarmat maanna inuusuttuaqqanut siunnerfiusunut aningaasaliissutaasartunit, kommunit ilitersuisarnermut pikkorissaqqinnermullu qitiusumik ingerlatsiviinit isumagineqartartunut aningaasaliissutaasuniit, ullumikkut ilitersuinermik annertuumik suliniuteqarfiusunut atuagarsornikkullu piginnaanngorsaaviusuni atorneqartartuniit.	Siunnersuummik allannguinnissamut tunngavissiinnngilaq. Innersuunneqarpoq 3.8 ilitersuutitut Naalakkersuisut qanoq 2018-imi Aningaasanut Inatsimmut siunnersuummi aningaasalersuinissaq inassutiginiarneraat.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Tassani pineqarpoq erseqqissaaneq, folkehøjskolit nalinginnaasumik peroriartuutaasumik ilinniartitsinerup iluani, ilinniartitsissutinik ataasiakkaanik imaluunniit ilinniartitsissutinik ataatsimoortunik salliunerusumik inississinnaanerannut naleqqiullugu.

Aalajangersagaq ima paasineqassaaq, aalajangersakkami taamaallaat pineqanngitsoq ilinniartitsineq siamasissumik nalinginnaasumik ilusilik, assersuutigalugu isumalioqqissaarnermut, oqaluttuarisaanermut, kulturimut, politikkimut,

inuaqatigiilerinermut pinngortitamilluunniit ilisimatusarnermut tunngasunik isiginneriaasilik, nalinginnaasumik inuttullu piginnaanerit ineriartortinnissaannik siunertalik.

Taamaalilluni maanna erseqqissumik saqqummiunneqarpoq, aammattaaq pineqarsinnaammata højskolernerit, ilinniartitsissutinik qulequttanillu nalinginnaasumik atuagarsorluni ilinniartitsinermut attuumassuteqanngikkaluartunik aallaaveqartut.

Taamaalilluni folkehøjskolini ilinniarneq neqeroorutigineqarsinnaavoq, assersuutigalugu højskolernerimut timersuutit qitiutillugit. Tamatuma saniatigut aammattaaq højskolerneq aaqqissuunneqarsinnaavoq ilinniartitsissutit iganermut, inuussutissalerinermut, nerisassiornermullu tunngasut aallaavigalugit, taamatullu højskolernerimi pineqarsinnaapput tunisassiornermut sammisunik sullivinni ingerlatsinerit. Taakku tassaasinnaapput ilinniartitsissutit sanaartornermut tunngasut imaluunniit qalipaasutut saffiutulluunniit sulianut tunngasut. Sanaartornermut sammiveqartuni ingerlatsinerit assersuutigalugu imaqarsinnaapput qamusiornermik, qaanniornermik imaluunniit qilaasiornermik, amernik meqqunillu suliareqqiinernik kiisalu ingerlatanik nunalerinermut naatitsisarnermullu attuumassuteqartunik. Tamatumunnga atatillugu ilinniartitsineq aaqqissuunneqarsinnaavoq tunisassiornermut sammisumik ilinniartup paasiniaalluni ingerlataqarnissaatut. Nalinginnaasumik peroriartuutaasumik ilinniartitsineq pineqarmat, sullivinni ingerlatsinerit pineqartut taamaallaat siunertaraat ilisimasatigut piginnaasatigullu kivitsinissaq, piginnaalersitsisumik ilinniartitsineq pineqarani. Aammattaaq ingerlatsinerit taakku kisimiissanngillat, taamaallaalli nalinginnaasumik peroriartuutaasumik ilinniartitsinerimi tamarmiusumi salliusumik inissisimatinneqarsinnaallutik.

Nr. 2-mut

Aalajangersakkap ajornarunnaarsippaa, folkehøjskolit ilinniartitsinerminnut naggasiullugu meeqqat atuarfianni inaarutaasumik misilitsinnernik ingerlatsisinnaanerit. Allatut oqaatigalugu erseqqissumik pisinnaatitsisoqarpoq, folkehøjskolit ilinniartuminnik meeqqat atuarfianni inaarutaasumik misilitsisinnaanngorlugit, meeqqat atuarfianni misilitsinnissaannut innersuutiinnaanngikkaluarlugit.

Nr. 3-mut

Tamatumani pineqarpoq allatigut allannguinerup kinguneranik naqqiut. Tamatuma nassataraa misilitsitsineq aatsaat pisinnaammata, suliffeqarfiit oqartussaasulluunniit nalinginnaasumik misilitsitsinerik ingerlatsisusartut isumaqatigiissuteqarfigeqqaarlugit.

Nr. 4-mut

Aalajangersakkap siunertaraa erseqqissassallugu, folkehøjskolit ilinniartitsinermik ingerlatsinerit inatsimmi imm. 1-3-mi taaneqartunit allaanerusut neqeroorutigisinnaagaat, ingerlatsisut allat tamanna pillugu isumaqatigiissuteqarfigereernerisigut. Ingerlatsisut allat assersuutigalugu tassaasinnaapput ingerlatsiviit imaluunniit pisortaqaarfiit il.il., nalinginnaasumik ilinniartitaanernut taakkununnga akisussaasusartut.

Nr. 5-imut

Aalajangersakkami pineqarput Naalackersuisut folkehøjskolit nalinginnaasumik peroriartuutaasumik ilinniartitsinerannut tapiissutigisartagaat, ingerlatsinermut tapitut aaqqissuunneqartussatut siunnersuutigineqartoq, aalajangersakkami imm. 1 naapertorlugu taxameterilu malillugu tapiissutitut, tak. aalajangersakkami imm. 2.

Tamanna pillugu nalinginnaasumik oqaaseqaatini immikkoortoq b innersuunneqarpoq.

§ 14, imm. 3-mi naggammi siullermi aappaanilu oqaasertaliussassatut siunnersuutit nassataraat, sapaatip-akunneri ilinniartoqarfiit ilimagisaasumit ikinnerutillugit, tak. imm. 1, tapiissutit utertinneqarsinnaanerit pillugu tamanut atuuttumik malittarisassiorneq. Utertitsinissamik piumasaqaat toqqaannartumik naatsorsorneqassaaq missiliuinertaqanngitsumik. Ilimagineqarpoq tamatuma allaffissornikkut pisariillisaaneq nassatarissagaa, maleruannariaanerusumik malittarisassiorneq pissutigalugu.

Aammattaaq imm. 3-mi naggatit pingajuanni ersippoq, Naalackersuisut taxameteri malillugu tapiissutit tunniunneqartarneranni periusissat pillugit erseqqinnerusunik aalajangersaasinnaasut. Tamatuma nassataraa Naalackersuisut pissutsit pillugit erseqqinnerusunik malittarisassiorsinnaanerit. Tamatumunnga atatillugu folkehøjskolit akisussaaffigaat, ilinniarfiit suleriaasiisa, ingerlatseriaasiisa il.il. malittarisassat malillugit pisarnissaat.

Aalajangersakkami imm. 4-p nassataraa folkehøjskolerneq ilinniartunut pineqartunut akeqassanngimmat, taamaalillunilu folkehøjskolinut akiliineq Namminersorlutik Oqartussat tapiissutaasigut taamaallaat pisalissalluni.

Imm. 5-imi pineqarpoq ilinniartut tapiissutisisinnaasut amerlanerpaaffilernissaat, tamannalu pineqartup aningaasaqarnikkut malittarisassiuunneqarsinnaanissaanik pissuteqarpoq.

Nr. 6-imut

Imm. 6-imi naggammi siullermi minnerpaamik sapaatip-akunnerini 10-ni folkehøjskolertunut ilinniagaqarnersiuteqartitsisoqarsinnaanerani aalajangersakkamut pissutaavoq, højskolimut højskolimiillu akiliunneqarluni angalanernut naleqqiullugu, folkehøjskolernerit ataasiakkaat pisariaqanngitsumik aningaasartuutaanerusussanngorlugit aaqqissuussisoqarnissaa pinaveersaarneqarmat. Taamaalilluni pikkorissarnertut aaqqissuullugit højskolernernut sivikinnerusunut naleqqiullugu ilinniagaqarnersiaqartoqarsinnaanngilaq.

Kiisalu aalajangersakkami naggammi kingullermi immikkut tapiisoqarsinnaanera erseqqissumik tunngavissinneqarpoq, folkehøjskolernernuinnaq tunngasussamik. Taamaalilluni tassani aningaasaliussat Namminersorlutik Oqartussat ilinniagaqarnersiaqartitsineq pillugu nalunaarutaani innersuunneqartunit allaanerussapput.

§ 2-mut

Aalajangersakkami siunnersuutip atuutilerfissaa nalunaarneqarpoq.

Aalajangersagaq isigineqassaaq tapiinermut malittarisassat aningaasaqarnermut ukiumut nutaamut malinnaanissaannut naleqqiullugu.